

龍  
眠  
風  
雅

卷  
廿  
五  
之  
廿  
八



龍眠風雅卷二十五目錄

木厓潘 江蜀藻輯

繁昌魏壽期朋三 祭

同郡汪宗周瑤若

汪國士 七十四首 吳國琦 七十一首



五國士

吳國海

同得田宗周註卷

海昌縣志卷三

水滸齋

龍眠風雅卷二十五目錄

龍眠風雅卷二十五

木厓潘 江蜀藻輯

汪國士

字君酬號皖公崇禛辛未進士起家閩縣令政尚靜簡革火耗斥羨餘為八閩最收揭陽值海氛未靖嚴保伍勸農桑四境帖然擢戶部主事督運通關持籌盡瘁升本部郎中以叅議備兵山東旋移疾乞休公老子車岸然自異其為詩幽峭莽兀警之服食猶桁衣之有火浣珍厨之有江瑤也所著簡軒十一卷皆嘔心琢腎刊落凡近不屑屑行墨間崇禛十四年冬賊蟠踞吾桐彈丸幾不保其除夜詩云望外忽除茲歲夕眼中猶見立春天未幾愛子陷賊憂恚以終門人謚端簡先生後之讀其詩者可以論其世矣

丈園醉歌

蟋蟀感涼夜志士悲秋旻黃金百鎰苦易盡有酒不得  
滄車輪兀兀復兀兀彌空商色來停雲何豔黹無庸開



我懷門前溝水倒不流  
皖公山頭掛玉鈎  
三尺桂樹苞新萼  
欲吐不吐香悠悠  
侍兒呼我睡我醉  
且欲舞手裡青龍  
好自羞多少鉛刀  
刺殺虎造物小兒  
不我予不我予其  
奈何霜宵冷瘦鳥  
吡吡安得美人挾  
琴嘯清歌雙手送  
過金叵羅願教一  
飲伍天河

贈李德林

南原雪勢不可勅  
獻歲十日無逢迎  
忽有平頭長二尺  
短衣大叫聲砰砢  
被褐出門一相向  
李子蒼顏有詩相  
當風佇立戳兩肩  
宛在灞橋驢背上  
自言薪炭一無餘  
擁被蕭條也讀書  
年來諳得貧滋味  
水到渠成轉自如

讀思獨坐卷二十五

獨坐對南陌  
悠然來遠風  
鳥啼清晝裡  
山隔綠烟中  
動極不知病  
靜時方悟功  
此生隨物理  
何事哭途窮

出門

出門無可語  
徒步且歸來  
日暮西山色  
悠然當酒杯  
牛羊下巘頂  
烟火起林隈  
寂寞霜天意  
孤飛一雁哀

簡軒成

端居懶人事  
簡出賴幽房  
月色方當牖  
鴻聲正度墻  
把杯觀化理  
撫劍惜行藏  
若問窮通事  
束籬菊又黃

散屨

奈此憂思迫  
聊爲散屨行  
平田荒日色  
遠刹度鐘聲  
歲月沙難住  
雲霞高自征  
西山一翹首  
又見草芽生



雨後

雨後山光翠晚來風氣和緣睜聊散步跋履更婆娑漸  
老因知命棲遲且放歌古人稱達者得意是烟蘿

處州

又復趨山路嚴州到處州問人行樹杪逢女只科頭縣  
小無城郭村多有店樓所嗟薪米貴行李亦堪愁

臥穩

臥穩簾帷靜醒餘耳目清近庵鳴磬午小檻曬書晴榴  
熟珠相亞荷衰蓋只擎秋容稍菸芭曠恨若爲情

高齋

高齋無所事蕭瑟對重陰客裡催年易秋來帶恨深斷

杯銷酒病攬鏡撥狂心遙睇橫雲雁行行度碧岑

肺氣

肺氣何時好霜寒逼節侵臥慵知老態酒斷出愁心雁  
過星移舍出鳴月在林自驚幽興苦新句怯長吟

寄沐陽令潘灼

念爾昔情親他鄉是故人飛騰別後事撥棄徃時貧坐  
月彈琴暇行花映綬新千秋一漂母憑弔亦堪論

飲吳中丞園林四首

鎮蜀嚴公去征蠻馬援還家園繫舊闢花竹是新刪匝  
逕添欄好迂池養鶴閒更堆山一座城裡日躋攀  
總是出塵意都來點綴佳梅看花在閣竹聽筍穿堦面



面樓迎爽深深水到涯風臺兼雪洞著處巧安排  
地卽平泉里人同白社禪莊嚴諸佛像瀟灑小壺天日  
醉七賢竹時看九品蓮此心要不染歌舞任留連  
忽憶一瓊日而今十五秋高楊原拂砌密竹近遮樓賸  
買東山妓仍寬北海籌飄零猶在昔接宴思悠悠  
甲辰予讀

書園中

### 西道望山作

驛道山根出西行與畫隨澗泉流不覺霜樹落先知茅  
屋藏何處沙田刈此時眷言好棲隱奈乏買山資

### 返照

返照射屋角片陰生遠嶠客心異庭草終歲有榮枯漸

老身何得長吟興已孤翛然一歸去作計守樵蘇

### 西館東示中隱

不知何所爲驅走十年餘天亦憐衰暮人今守故墟舊  
貧通雀鼠新懶狎禽魚若問逢迎事如君迹也疎

### 醒餘

飲酒但宜醉醒餘悲故貧一瓊偏滯我三泣未逢人枕  
帙銷華鬢封書隔老親魁廳何事闕更益睡中嗔

### 孤坐

諸情都欲罷孤坐自能堅對竹娟娟色看梅漠漠烟俗  
人教僕謝酒債典衣填外此渾無事閒心默似禪

### 題盛屏之爽園



子猷看竹處靈運養病園結構能因勢幽深別作樊萬  
松中有榻衆鳥外無喧何必拳花卉居然景事繁

雪讀

丈園三尺雪映讀一床書貧極反無債病添閒有餘  
軋青看蕙發苞紫認梅舒却笑南原上琴歌是我廬

臥雪

獻歲雪逾積干人薪炭難從來耻東郭聊復效袁安  
日午閉孤室炊遲減一餐固窮應自昔不敢起長歎

投子

投子東陂路經行一惘然翠屏飄敗葉青鏡感流年  
牧唱夕蒲地花開晚稻田予心終不遠無計住山邊

病中午坐

冬日影迷離焚香強坐時案書無次序爐火有威儀  
老病醫難効妻勤婢豈知菊花黃負我少亦一千卮

病後

病後淡無念乃知身本閒就檐烘日火展畫玩家山  
戒酒新開限踈交不掩關近來惟習懶于迹似爲慳

誕日

誕日不延賓偏于簡淡親自持衰拙意難與少年論  
戒酒銷多病栽花過小春世途無限理諳久亦須真

庭菊

冬暎喜新雨潤茲庭菊枝廣檐聊以晤孤酌亦能詩  
得



爾遣今日與予同後時不知高慕者千載說東籬

### 長廊

翛然奚所務獨倚在長廊未晚天懸月多風夜作霜酒  
因添歲戒菊自後時香漫漫思行逕胡爲咏太康

### 同吳湯日過訪公良邸寓

耿耿夢園邑茲來匆遽同笑烘春夜冷書寄隔年窮驛  
柳疑青外鄉梅是白中看君初一榻無事不清通

### 清朝

清朝坐堦廡盥櫛不勝情鏡裏頭偏禿梳間髮易盈病  
添兼病減秋雨復秋晴只送年光去中懷百未成

### 出簷

出簷步明月月光清衣襟初雁不成字百蟲相與音端  
憂弭晚節長意軫中林拚飲那能醉徒令白髮侵

### 客眼

好是江邊地猶令客眼醒鴛鴦宿岸白榆柳入冬青漁  
舸寒烟耀夕陽荒草汀兵戈不到相對掩柴扃

### 靜海縣

極望荒原外旌旗轉自悲棗田枯樹畫旅雁斷碑詞有  
雪墻陰剩無僧殿屋墮下車詢父老憂旱兩年爲

### 雨中過訪中隱值別出讌詩以謔之

出郭訪君子西山徒一迴應門兒當僕老屋柱生苔濕  
竈久無火推窻剩有梅却多寬意緒猶戀五侯杯



飲何成仲署中

筋骨亦云健不然勝此勞故人好顏色猶未失風騷入  
境喧清政開軒飲濁醪相詢五年事仍是一綈袍

擬過瑕仲東齋

窻鳴鳥聲碎枕上報春晴陂柳日搖蕩東風吹我情懷  
歡苦時短立節恨名輕櫛罷多閒思還尋阮步兵

初夏想虎子

遠樹縈烟帶新荷疊水錢子規爲夜鳥麩麥是秋天晝  
漸長無賴人於睡有緣他皆不作想時一想僧顛

醉甕蓮邊

落日過墻去微風到戶薰亂蟬成一個新月正三分穀

貴炊宜儉蓮開賞獨勤晚筵能徙倚香露襲餘醺

入春

入春雖未久春意已蜚微雪瘦添溪飽花艱讓柳肥長  
衢車蓋溢小市賈人圍不見高樓外雙雙鳩鳥飛

姑孰九日念兒

有何佳節序作我負黃花天只高難問愁無再可加似  
予那用老怪爾不思家楊柳衰殘意瀟瀟領暮鴉

首夏共瑕仲小飲

高簷靜閩人無事首夏晴和氣復嘉荷葉如錢漸如鏡  
杜鵑爲鳥又爲花長鬚奴貫清明酒折脚鐺衝穀雨茶  
不是郭林宗一到不須常客溷停車



道中卽事

已賁弓旌使事終王程猶自及丹楓驅車摠在千崖頂  
望遠飄如一水東蕎麥有花方賽雪豆棚無寔已凄風  
看它茅屋人家意亟戀西坪小桂叢

桂花

桂花欲吐復不吐時一暗香來坐中看到枯榮皆至理  
誰言消息盡秋風人閒得雨尤添靜詩老據情莫論工  
往事幾堪回首算鬢毛稀禿漸成翁

雨晨

曉起披衣愁不醒望中烟雨復冥冥淒迷坐失山峰綠  
洗濯轉添堤樹青得水鳧鷺來近浦趁春蓑笠滿前汀

何年老作郊原客把酒農謠只自聽

病中栽花

鑿甕栽花簇倚楹城中閉戶一先生近來養疾兼調性  
只是延醫尚採名坐就太陽筋稍展行扶小婢脚初輕  
親知莫怪交酬廢鹽櫛經旬亦未成

日長

日長常是抱書眠百事紛拏耻作緣老至漸看人淡冷  
向來都避客轟聞移花蒔盎初承雨糴穀支厨乍起烟  
却笑王修齡一箇賴誰乞與作碑錢

卽事

遶簷孤步意于于日影升堂桂影俱自喜身從貧裏出



却將詩作老來娛  
人閒戶靜雙僮子  
髮少巾敝一腐儒  
不是招邀時出飲  
居民不信有潛夫

清明

晨起瀟然絕送迎  
兒童插柳報清明  
自驚興懶忘佳節  
也恨春多溷雨聲  
遶檻只看桃謝盡  
捲簾又擬燕生成  
東皇不合無拘束  
一任韶光逝水征

暑中晚酌

不以行藏強問天  
不須夔足遞相憐  
終朝事過皆如夢  
偶爾詩成亦有緣  
掌大蓮花高出葉  
肩高竹笋大如椽  
看他嫋雨嫋風意  
欲傍清尊那惜錢

借得

借得王猷種竹居  
便同陶令愛吾廬  
臨階日曬壺中藥  
到戶風掀几上書  
固已能成暑不出  
但猶未識死何如  
雲天晚暮墻陰落  
祇辦清尊賞瓊菓

萬里橋舟中

一葉容容掉小舸  
郡城歸去起歸潮  
江天自可閒紗帽  
簫鼓何勞咽石橋  
四野黃雲粳稻好  
幾枝紅映菊花嬌  
焚香令尹無公事  
挾卷看山意轉饒

寄喬菴吏部

自笑慵多與世違  
巨源知我勝吾知  
而今老豈能爲佞  
此地官猶得賦詩  
瘴海望鄉如望雪  
嶺梅憂寄不憂遲  
煩君并向龍山道  
只恁心情鬢益絲



晚泊高要縣鎮

日銜山尾變山容都受深藍淺翠封一片月來臨瀚海  
許多帆到落雲峰隄村犬吠徐收旆野寺僧閒早報鐘  
紗帽也隨鷗鳥住苦勞簫鼓震魚龍

東莞河口

永夜孤舸海國程水將天共一時明波紋不展因風死  
櫓唱初停待月生船上鼠姑何所嚙岸邊魚子若相縈  
喚人開著篷窻臥只到聽雞夢未成

博羅江舟中乍寒因懷林二酒徒

粵江風雨驟凄然浪冷鮫宮蜃宅偏夜永子京無半臂  
寒深孟浩有雙肩却思雪白楓丹地舊是非詩卽酒天

買得百壺煨得煖髯奴一吸似鯨川

偶醉題壁

老來作吏日波波歸到深堂賴綺羅卷耳細斟蓮葉酒  
霏烟低唱竹枝歌腮邊月映花光靨頂上雲盤黛色螺  
不向夜中銷一醉不教人奈暗香何

多病呈李雨然年兄

多病微軀強自持侍兒搯扇寫新詩山人見餉茶方受  
僚友相招酒盡辭群鵲噪簷家信近一鷄啼樹午烟遲  
紀綱共咲貧無俸入市新茄乏買資

懷齊二公遜

折角紗巾舊緼袍曉簷孤佇意蕭騷人過半老從頭苦



官爲分司徹底勞涼日漸宜于曝背好天都未一登高  
却思北郭呼盧地各別雲山首禁搔

夜泊

何處漁燈一點懸孤城茫昧泊孤船白頭浪浸先生桺  
赤脚夫喧種秫田際曉始知彭澤縣隔江猶望馬當烟  
石尤滯我胡滋甚日睇桐廬若個邊

寄瑕仲

此地重陽不解憐今年空過菊花天終宵聞有鴛鴦唱  
十月書無鴻雁傳龍嶺已知冬欲雪鮑江猶見瘴爲烟  
新來莫問潮城吏一倍絲侵兩鬢邊

肇慶回泊三水縣鎮

冥冥天際絕飛鴻入望遙看杳靄同海外一峰偏受日  
夜中孤舸若凌空猶嫌鼓吹驚漁父自爇爐烟喜令公  
歌罷擲巾燈影裏如蓬雙鬢遽成翁

官窰江

桂檝蒲帆不肯開窰江閣淺待潮來正逢一陣雲中雨  
隱聽數聲天際雷畫舸轉將官作客閒愁却起老爲媒  
蒼梧寄酒白如雪買得依然懶命杯

無題

斜月雕欄許罷凭微風繡戶掩毛氈一爐温煖龍涎火  
半盞昏明鳳脰燈待解砑羅衫未盡只鬆金紐扣猶曾  
此時已傍紅鴛枕喚著名兒却不應



家宴次兒啓

一家骨肉對銀缸共酌新槽酒一缸楫樸火添紅入座  
玉梅花噴白當窻頭衰廢櫛絲紛墜眼暗看人影亦雙  
自分太平無我老且拚醺醉令心降

辛巳除夜

銀盤送酒燭光圓一首詩成又一年望外忽除茲歲夕  
眼中猶見立春城頭不住鳴鉦鼓座上相於捧豆籩  
憐取兒孫當亂世頌椒傳柏亦潛然

偶題

春意未酣猶澁柳鳩聲便好不離桑泥中盡著紅梅瓣  
天上初排紫燕行

清明輿上作

尤雲帶雨徧山窪小婦墳回一醉譁皂隸不須呵斥起  
看他頭上杜鵑花

六月菊九月猶開

庭前野菊勝真菊六月花于九月芳可是天憐陶靖節  
不教無菊度重陽

十九日菊

重陽已去經旬日菊影初移照酒杯喫酒酌花翻下淚  
此花元傍戰場開

桃源洞二首

盈盈相望武陵津可惜來時不及春不見桃源花片水



何緣得遇避秦人  
我來解得陶潛意不是仙源杳問津能此誅茅居洞口  
便應都是避秦人

蜈蚣嶺

噴吭直撼天關出宛轉真盤地肺來絕頂到時無所見

紀元隆慶一碑開

吳國琦

字公良號雪厓崇禎辛未進士筮仕蘭溪下車甫三月有玉蘭瑞麥之異蘭人士形諸歌

詠至今以為美談轉漳州司理政寬刑簡漳人立祠祀之升兵部主事公學該墳竺援據輿衍尤湛于經術所著渡江九策皆切中時務惜無有知之者為詩歌力去陳言持擇矜慎與汪叅議皖公同出何文端公之門投分最深而詩品亦在王孟之間有懷茲堂集八卷閩中曹能始為之序而傳之

春曉禮佛偶憶東湖儘休

幽芳襲我戶鳩婦呼我簷朝曦啓前林披帷不能眠素襟厭塵軌閒庭殊靜便龕火有餘輝石鼎生微烟眷昔靜者居與我同林泉今獨往東湖湖水澄且漣曠望渺無極九華落窻前柳青潮日白崇情感推遷

勞勞亭送所知

春日勞勞亭勞勞畏芳草以我今日情臨此古人道不逢董雙成容顏豈常好青絲繫馬蹄君子行役早一聞杜宇聲柳花不可掃願言盈青尊努力以自保

石浪上人見過值他之

幽壑團松篁古澗亂魚鳥時有薜衣人穿雲度山表我亦厭塵紛立棲頗好道忽爾過前溪溪聲何浩浩藤蘿



音耳居形卷二十三  
候谷口城烟淡何有萬物俱有緣孤心獨無偶低徊日  
云暮幽芳湛輕露之子得無歸猶是來時路

河上林男夫雪後看月

雲月夜一靜衆星亦寒徹對飲各興懷照人偏照別千  
里淨光同南舟與北轍河草年年青河流年年折遠道  
不可思遠道不可說

采藥行至西厓

所住非所營種藥安盈園臥疾起櫛沐幽禽時一喧策  
杖出門去得枝如窮猿桐林吸晨霞旭日昇高原露徑  
入盤磴澗湍何潺湲上有青松覆下有兔絲援服苓益  
人壽密葉欣其繁水碧不可飲靈芝不可發達人守微

和呼吸通天門不以動息累冲夷寂無言羨門與王喬  
遐齡復誰論

同王生生石卿入褒禪山作

池草一朝發東風昨夜生遊子動歸思好鳥繞屋鳴友  
生意有適攀蘭釋羈情去郭逐流水石壁香閣橫閑門  
開沉潭野鹿潭上行小桃映修竹山僧出懽迎孤塔攬  
八極遠色來滄溟淡然忘日夕緩絃遺世榮

再至蒼山草堂東歷陽諸友

雙峰夾澄江孤帆入江口東風何處來綠徧堤楊柳記  
我別子時不謂如斯久一一訊所欽所欽都在否昨夜  
隔江鐘寥寥到峰後一片懷人心聽之不飲酒東風與



鐘聲慣送人老友

喜胡躬未至

子從賊中來絕無風霜色知子氣力定交子固有識年  
少束髮時其益乃在直直為交性命此道久失實前者  
聞賊來問子獨不亟貧賤百年心何不能守塞子其詳  
觀我得無情不抑率爾命盤蔬願言為我食讀易子之  
素於賊著一劫

郭門西橋垂成予歸囑諸父老

損益還自知川流懼其變壑雲易為雨江波改拖練往  
來爭渡人胡越視鄉縣使君常淹留意比飛鳥倦欲速  
殊可慮有生焉得賤憂患切予懷深潭湧鐵牽鬼神樂

啓人亦復助小善誠哉浩淼中沉溺豈難援百航聯手

足兩岍青山見努力圖厥終無徒牽衣戀

橋蓋牽舟為之忽有鐵牽

湧出可牽十舟

七月十五夜隨喜問公施食惠應寺

生生不知歸大覺振寶鐸紛然世網中坐令憶魂魄能  
于彈指頃慈雲布寥廓孝子心無已竒懷泊冥漠不暇  
計存時善著無有惡仁者更惻怛惠弗于我著生死日  
無數豈必皆極樂征戰悲蠢茲恐怖難銷却種種良不  
齊安能為解縛遺教云自恣施食所利博古德來何方  
勝因欣有託鐘磬驅繁音明月度高閣長松散庭陰露  
下寒帷幕終始集晝夜罪福誰造作斯義本尋常輪廻



等今昨梵語未可解解亦太穿鑿置身香光內浮喧白  
可畧諸天如不遠瓜餅來飲酌始悟息塵情鹿門宜堅  
約

桐江望釣臺禮嚴先生

客星墮地成雙石懸厓直挽桐江碧欲去不去江淙淙  
石有青松皆作龍雙石卽爲客星坐何處堪供帝子臥  
古人交情澹如此一絲長挂桐江水我來正值千峰雪  
桐江上下人行絕桐江東流無盡時哲哉先生真可思

中秋明月篇有寄

明河倒瀉幾千里大地橫飛玻璃紫雲母屏前細剪雲  
水晶簾外頻傾水武夷鹿脯曾孫懽文簫鶴馭彩鸞喜

瑤井金吹瓦色霜連薨瓊戶生微涼六街昭回疑練白  
萬家燦爛擬珠光楚袖吳歌弄雪濤嫦娥浴玉秋空高  
肌骨香飄佩桂子醉人潦倒如葡萄秉燭不須煩過客  
銀橋直接東南陌洛陽笙管繞風塵自爾冰壺可濯魄  
可濯魄飲文露羅帷不寢舒毫素星芝曳練斗橫斜還  
邀來夕芳暉駐

午日文天夢先生見招阻雨歌答

欲曙未曙東風高雄鳩呼婦何勞勞欲眠不眠窻復黑  
風雨突飛撲簷亟巨鼇震撼三山失雲霞倒捲翻蛟室  
杏子黃時潮水多螻蝻鳴來今幾日小兒拍手牽綵縷  
先生邀飲五月五湘沅招魂魄弗歸天吳地號江妃舞



音韻月利卷三十三  
炎帝凌空輟火龍玄鳥入帷愁艾虎我渡東溪應難渡  
溪霧溪水連溪樹遙憶銀盤剪玉蒲獨酌高懷託毫素  
恨同野老扶杖藜水田漠漠無高低鳥送夕陽影橫疾  
柴門共倚看虹霓

水燈作歌

長安正月燈市喧水雲空鳥何飛鶯亦作花枝紅朶朶  
海岳嗟峨人騎奔其材裁竹與縫縑或貫晶珠手織織  
農家剪麥似呈巧高樓笙管輝青帘物各肖之吸皓魄  
永夜炯炯遍街陌我來同客照眼明樸而稱工取剪麥  
中有垂英尤覺別如日出海月出雪冷韻宜人特矯矯  
麥竒在樸此在絮東風欲歸尚難半呼童買携捲文幔  
酒力雖微對讀書寒波點點春星爛

赤曆行

前山有虎後山狼不知溽暑與繁霜一亭兩亭紅未遠  
半日十度等尋常茆屋倚暑風雨周門前尺深牛馬溲  
剡松燃膏夜成晝吁嗟擁吏乘小兜輿中人睡無聲音  
叱咤瓜牙突生擒燎原一身需四炬蔗門蓬戶皆搜尋  
年來歲惡饑饉兼下粥無豆湯無鹽載芟載柞阻力役  
昏黑馳驅覓酒帘昨聞發粟倉廩開呼鄰却走城中來  
市兒鬼蜮粟貸盡夕陽咽咽徒空迴雖是瘡痍仁者蠲  
亦戒寅年支卯年千錢給我吏索百重門虎守叫難前  
東村有米西村春五百里外舟車供關津鐵纜容易解



多稔多忝猶歲凶曳雲逝水饑寒傳調兵催餉敢遲延  
前宵稽留漏纔下亭長提去那無鞭

聞雁

今夕寒林外能生一一心旣明千里月尤急萬家砧燈  
火孤裝薄秋聲何處深張弦思譜入茲意却難尋  
囑懸采爲集開士誦華嚴經于毘尼庵予讀書處  
草草出關者函經冀一開饑無乞米處寒自寄衣來松  
色深紅墪溪光映綠苔山空偏久住纔見住山才

雨泊

計程纔百里舟幾住菰蘆江氣潮方動詩情雨後孤邨  
酤逢暮好遠雁入雲無望望彼漁者風波殊不虞

晚霽之虎丘同叔父無咎胡躬未兄公著用情字  
歸飛看鳥疾聊以起初晴古寺危橋隔人家溪水明蘼  
茶空客供逸火肅山情未及跣趺坐歌聲接櫓聲

殘月

殘月如新出征帆急早潮雲平不辨樹霜滿欲迷橋客  
久思晞髮心慵畏折腰櫂聲如水鳥啞啞度寒宵

南郭有所遲

東峰連洞府雨水護孤城更有一山秀朝朝與送迎燒  
青官渡亂沙淨埜鷗行委曲郭南路遙懸驛吏情

雪意

雪意驚高鳥風聲竦暮林邨烟衝水渡孤磬隔峰沉琴



止燈初豔江寒夢不深勞舟沙岸泊漁父莫相尋

### 泊舟

人語疑城近綠陰邨舍亘水光翻白照烟路轉青迷隔  
岸群峰色沿堤芳草齊江南三月裏處處鳥爭啼

### 舟暮

夾听青峰裏鬪鬪白鳥光晚風吹小艇竹屋枕荒崗樵  
影破山路灘聲喧夕陽印文封薄暮好月欲琴張

### 晚泊錢塘聞鐘

一櫂夕烟外霜鐘何處鳴忙心江听歇佛火樹邊明徹  
入魚龍藏偏宜吳越城良宵應美睡喧莫問潮聲

### 新月

練文生歷歷臨鏡擬江妃邨樹忽孤出水禽相命飛非  
關添客况亦是樂寒威何處懷人切開簾恰上衣

### 坐趙澱陽先生蒼漪閣

高亭敞木末此意與秋生當戶一峰出雙江夾月明藤  
蘿封洞壑河漢接簷楹坐久絺衣薄懷人已二更

### 關居

時在劉不夷東園

尚記春初至鶯花已漸深難持惟淨戒不了是名心兀  
坐書空字懷人作越吟窮通窺物理客夢得無侵

### 雨中坐龍眠山房

入林關未啓石壁動雲陰微雨上峰色焚香欲定心蛙  
鳴知夏久衣薄覺山深永日無人迹相看不廢吟



入龍眠山房道中便訪姚康伯時康伯抱病  
去郭適來訪衡門映水邊文心堪對竹詩友易逃禪孤  
坐凝朝氣千山散暮烟所居青嶂裡君聽幾迴泉

中秋前一日登西山便尋爽園靈泉寺

林色到山淡將分天地秋暮雲橫寺冷爽氣入園幽雁  
路憑空闌麋蹤倩葉留閒情渾不厭殘照散峰頭

夜坐

起視此何候虫如促織鳴我衾亦厭薄山雨又來生夢  
緒兼燈暗雲窻代月明遲遲猶不寐未免遠人情

經良鄉輿中誦金剛經薦陣亾者

歷歷驚心骨非過古戰場經聲如有覺兵氣倘無傷鴉

亂孤城暮烟吹幾竈荒承恩俱不賤爲鬼亦擒王

初至長安喜汪君酬及家湯日見過

半榻予初下門因二妙開故鄉人問雪新竈僕愁煤甌  
冷梅魂韻簾踈雁影迴細論春夜靜好月莫辭來

山尋

荒荒寒雨外隻隻鳥飛還我亦從茲去斜陽渡口山花  
村春正急草閣爽初閒選勝煩隣里千林定許攀

寄姚康伯時避賊秋浦

避賊貧難遠蒼茫僅畫江家山千萬岫風雨入吟牕病  
骨饑偏瘦談鋒老不降客愁常獨立歸鳥自雙雙

韓芹城招同張淶漁陸沁雪小集有贈奉答



晚霽遵前約微涼動竹軒昔年拜母意茲夕致身言安  
雅文章在孤情古鑑存明時予努力端不遠寒暄甲戌先母  
在新安芹城不遠  
百里拜之于堂

蝗

何期兵賊外爾復早秋生渡水移雲色騰空亂雨聲迎  
神喧戰鼓欺客蔽行旌畦畔勞勞者呼天愈不平

自漢興至建安郡舟行

愁客紅亭泊懷人穀雨天叢蘭芳到市茉莉白盈船淮  
水深南國鄉心結暮烟橫空揆雁字爲寄草堂前

郊外

窈窕尋山徑參差賣酒家短籬傳宿火初日映朝霞新

水魚竿直微風燕尾斜經旬身懶動處處欲飛花

寄題劉元敬水簾居

長堤草色已成茵更有桃花樹幾春月冷犬聲渾似豹  
庭空鶴影却疑人三竿潮上時乘舫半畝烟深靜理綸  
偶憶天台君梓里水簾相召只西隣

玉河聞春水聲有感

恰瀉昭陽二月春馬蹄初暖響偏新頻催花使先風信  
又滯歸期後雁臣聲動玉墀消積雪色分銀漢淨浮塵  
不須流向人間去曲曲飛光映綠蘋

送方君周倪君符南還

帝城朝雨蚤啼鶯可耐名花別長卿驛路柳深牽遠夢



故鄉人到值春畊書于再讀如逢友酒可消愁卽養生  
盛世桂叢無隱者重來長樂候鐘聲

汪君酬約同里諸兄集高粱橋

春溪如許未開扉邸苑紅桃昨欲飛爲愛遠峰因命酒  
但隨流水便忘歸異鄉茶信期僧切故國方言入字違  
暝色觚稜啼鴛鴦郊風寒食且寒衣

雨止

夾岸殘楓亂埜燒江雲風後疾如潮漁舟爭米移紅蓼  
病骨防寒晒紫貂汲漸不渾茶事濟絃初能勁譜聲調  
漫愁入粵人千里夢出篷窻半六橋

江漲

鷺鷥灘上濕雲昏白雁灘前浪打邨護郭圓沙全隱脊  
瞰江高閣畏空蹲却知花沁蒸黃蜜但祝堤開散白豚  
田不勝山千澗落迎神穀樹四郊喧

湯日辛未春南還最遲別之兼寄同社諸友

去去移時又整裝此中情態費商量得無戀國兼懷我  
不分難沽便易藏馬倦夕陽河水澗人歸春老燕聲蒼  
萬峰深處多兄弟再拭干將更有光

內子白門除夕與男弘安奠先母

皤皤俎豆好親治此夕椒漿婦獨持膝下每聞傳父訓  
衰年最喜弄孫枝帝城簫管千門徹子舍尊彝百代思  
爲憶衙齋逢吉日慈帷屈指早朝時



音見風雅卷三十三  
秋夕方坦菴以所叙汪君酬燕鐫並自訂白門新  
詩見寄答之

木瓜香老度茅茨靜對新詩坐起遲  
行路久知經杜甫道心差可共王維  
唱酬白露蒹葭外簡點黃花風雨時  
最喜友朋耽慧業一尊深夜足歡持

孫本芝招集郡齋同郭完赤姜青門

細雨黃昏芳草齊鷓鴣啼處海天低  
鮫人待月占潮信荔子凝香踏馬蹄  
臥閣官閒推汲黯裁文鯉徙重昌黎  
十年遼瀾看星聚深坐高燈聽曙鷄

馬蹄蓋閣帖云

蚤發信州東花君御時君御先之婺州

五年人識使君舟遺却青霞費夢遊  
新箬編篷全障雨

曉烟渡水不驚鷗梅花歲晏懷鄉國  
橘市霜寒鬧信州世路參差徒轔屐  
山靈應自笑王猷

雨日大雪

長廊雨響雲俱黑頓止雨聲雪漸明  
春事一晴一動盪梅花不冷不縱橫  
老夫憂患生煩促大地蒼涼對水晶  
粗糲舊醅高臥美江干幾日少將迎

飲雲樓自咏

竹院藤陰傍水涼危樓高坐日偏長  
古人啼笑誰關我老眼悲懽自許狂  
善病間憑身几隱讀書便是白頭忙  
從他剥啄生嗔得少小殘編不肯忘

送伯兄入白楊山中并示諸姪



水入鳥金水亂交柳峰峰影上松梢舟藏壑裏師莊叟  
天在山中占遯爻先世爲農僮勿情此身耽懶子須教  
予年半百勤堂構簡得牙籤手自抄

飲雲樓無題

客來客去草堂虛自是先生交接疎長餓厭書乞米帖  
閒齋肯煮放生魚蕉心忽動怒雷作虹脚仍垂佳雨餘  
高枕簟涼圖美睡綠陰誰不愛吾廬

遊報恩寺

在家常任出家遊瓦鉢芒鞋拄杖頭倘得坐忘應歇脚  
譬如興盡也回舟袈裟欲綻裁荷葉塔廟難支學鴉鳩  
最愛匡廬陶處士纔聞鐘響已歸休

圓通寺曉霽

初日上前檐雨聲何濺濺披衣重側耳乃是山中泉

宿嚴灘

徹底無纖翳一絲牽淨淥始知釣者心不落風波局

答孫宇周送秋海棠

紅于霜葉兩三枝斜寄東籬雁到時睡足小窻偏憶尔  
西風吹入少陵詩

宿樟樹潭

山雞知不昧風雨啼在深林醒在舟人語隔江呼早起  
西山黃橘已千頭

午憩古榆菴東諸上人二首



老農喚犢犢知歸  
墻裡枝枝杏子肥  
洲燕撲簾與夢醒  
香風吹綻野薔薇

花山茶煮茶如花  
泥塑伽藍渾作家  
竹院半陰能坐客  
又餘隙地曬袈裟

西風指諸同行輿中望浮山

小窻曾繡青螺髻  
此地蓮開佛面花  
翻是輿中全見得  
倘行山裏覺山遮

蘭江至錢塘三首

江風漠漠山風寒  
亦有鯉魚來上灘  
不必桃花春水闊  
溪香兩岸總多蘭

祝年原不異三農  
千日勤渠此日逢  
沙白江青齊伐鼓

家家負米急流春

鼓擢吳人歌覺喜  
滿江細浪生圓文  
青霞奕者金華牧  
許我成僊定幾分

荔枝詞二首

微啓丹唇貝齒香  
水晶宮殿飲瓊漿  
煩襟頓醒渾如醉  
笑舞風前十八娘

珊珊移出小欄干  
鑪燼沉烟午夢殘  
不信稱他情性熱  
纖纖著手雪肌寒

浮丘山人索贈

縹渺雷牙挾雨飛  
石溪草綠犢初肥  
鄉人老亦惟鄉井  
日日雲歸我未歸



音韻通雅卷三十五  
過春穀懷戴叔度先生

海東纔到復江西一路烽烟亂鼓聲不似當時春穀上  
綠楊深處聽黃鸝

漳南楊漣漪憲副書來並寄普賢開元寺僧書及

名香一瓣書云諸寺刻檀爲予像祀之至今屢

遭兵火巋然獨存予感而作詩寄答漣漪

四千里外一枝香迤愛思如流水長慙愧我身猶肉食

琉璃鐘磬普賢傍

龍眠風雅卷二十六目錄

木厓潘 江蜀藻輯

武進董以寧文友

叅

同里左國材子厚

姚康 八十八首



龍眠風雅卷二十六

木匠潘江蜀藻輯

姚

康

公所重以天下多故不求仕進肆力詩賦古文辭  
 自出鑪鞴不踵昔人畦徑崇禎中有以賢良方正  
 舉者謝不就史相國撫皖時單騎造訪延為記室  
 飛書走檄皆出其手而絕不干私生重行誼  
 慎廉隅諸當道爭以禮幣敦聘不可得也晚歲益  
 苦貧與左侍御三山公研究禪乘往還扣擊所著  
 有安危注借紅亭本草籌債堂稿宋史改本江淮  
 小草掌慧軒集僅太白劍二卷行于世先生沒已  
 十餘年方繡山民部復序其貨殖傳論而梓行之  
 卒年七十六圖其石曰休那鄉人稱休那先生

懷方素心

天之窮方生其窮窮于死既殤僧虔弟復奪履道子但  
 餘張儀舌空有待詔齒賣文三十年所得薄如紙途窮



歲復暮瞻鳥將安止與君少相歡譬采蘋于汜安得肉食人一一盡嘗此我歌以當泣君詩可爲史千秋萬古情灞橋風雪裡

哭方克壯

吁嗟乎克壯靈鬼觀匪夷談當碣石宮醉當采石磯狂當搥鼓吏雄當捉刀兒快當寄奴擲怒當博浪椎成當大風歌敗當歌虞兮所爲汝勿悔一往方庶幾

寄方小白

明妃夜看單于帳霜月滿天角聲壯酒闌燭滅聞悲風琵琶一曲思漢宮佳麗三千隊幾人得賜青羅袋要識娼門也自強語笑知音多姊妹

弔亞夫

漢信爲能用三傑乎曰未盡也楚信爲不能用范增乎曰未盡也夫千載至今知有居巢范亞父者以楚用之也漢之于淮陰無論卽留侯亦云上數在困急之中幸用臣策今天下既定雖臣等百餘人奚益則帝固亦用之未盡其用之盡之者獨一蕭相國何顧後世之士有志者將爲留侯乎抑爲蕭相國乎故楚於亞父正不在用而在用之不盡夫羽之用增之用其妙皆在不盡盡之而爲高帝蕭何一部廿一史中纍纍者項背相望也又何當於予歌



天爲奇人布奇算寧予之楚不予漢予之以漢又何如  
嗔人但作蕭何看位次之爭胡爲乎丈夫當賴鄂君無  
我來弔古極千里徃徃百靈皆可呼見說沈伎能翻泉  
下曲又聞陷城時現氣中圖此類當時無此苦神怪何  
從得如許迺知若滅若沒之中間是公君臣立命安身  
所世間幾道作英雄局格門庭各不同楚能用公不止  
此止此却成范老子

再弔亞父

此初作也以其入議論故去之去之復存之者  
或議論亦不可少也人之有羽有增自是天地  
間一種奇岸俠烈之氣所生成所配合極相知

而微不能相用微不相用而終不害其極相知  
如陳平之間行而羽內疑增增大怒曰天下事  
大定矣君主自爲之當其時使以高帝爲羽旣  
疑其人矣其人尚得還之以怒激之以歸歸尤  
及爲彭城之鬼乎然則增決非高帝所能用明  
矣能用增者羽也予嘗謂秦漢之間政由羽出  
其將相多豪傑史當特取一二人別爲一傳季  
布雖有傳其事漢者傳事楚者不傳也如增年  
七十好奇計則五年之間所効之羽羽所不能  
用如高帝之言者必大有事在今惟一鴻門之  
會不聽殺帝其它皆惡得而知之一吳王濞不



用桓將軍策其策尚附見于史史獨于增何略  
邪有史之略于傳則有予之詳于詩

丈夫之生長有以徼天只在一知己天之爲公營此人  
先營其目重瞳子三日之糧秦就纍六王之復楚爲紀  
有何一事發縱指示不由公以此抒吐平生亦足矣觀  
公之氣亦何激獅子堂堂見胸臆鴻門玉斗觸手碎彭  
城歸車應聲飭嗔喜去任只自由此事漢庭寧可得意  
見同異有聽爭陳平草具何曾靈爲問彭城范亞父何  
似鐘室韓淮陰劉季徒大言得時誇好手以不用公爲  
楚詬此語決知公不受公之不受不爲公爲知我者一  
重瞳

石馬謠

或作謝逸中隱  
詩未知孰是

尚書墳前雙石馬照日吹風遭雨打歲久莓苔生滿身  
泉下之人可知也富貴功名竟若何生居華屋死山阿  
當時歌舞尊前滿今日牛羊隴上多

妾死歌

我妾死君妾悲悲者雖妾淚霏霏君妾悲我妾笑爲君  
更述平生調憶我飛騰佻達時涕泣塲中舞柘枝三十  
之前二十後看看惹得眉頭皺萬事傷心疊疊來剛腸  
百鍊恰成灰月缺花殘都是淚酒闌人散便興哀此情  
此景真成幻樂極悲生君自勘非關我死漸漸重當由  
君淚漸漸濫君不見霍家高塚表祁連又不見衛公遺



像在凌烟得君幾淚值幾錢吁嗟乎若使君淚果值錢  
豈能滴向康生邊

絕命歌

莫嗔骨肉死阨阱來路原分暖與冷崇殺汎酒共追懽  
幾見團沙得成餅轉眼卽滄桑何處認爺娘分指卽吳  
楚兄弟在何許虎皮座上談孝弟直似元宵打燈謎有  
緣鞭影度良馬無緣棒喝皆聾啞

紅梅

嶺上東風急枝頭剪絳紗居然桃杏色不復雪霜華玉  
骨多醜酒水肌盡染霞燒空烹夜月流血濺寒花

燕京寄醫士張心恒

薄遊同一味其味不同嘗郭隗非吾事并州亦汝鄉無  
驅窮鬼力有養喜神方眷屬多相託時煩過草堂

清明後至弟墓

地下今安否人間竟有斯更無天可問只有死堪祈急  
難懷兄弟飄零感歲時清明寒食事自此或愆期

宿雙峰庵月下聞潮

琴尊淡然夕林臥遂忘還山鬼或同夢世人無此閒遙  
岑導鐘路素月素霜顏此際聞潮響誰能靜掩關

送相明燕回兼簡玉和

賈勇同來此移時興已違恐傷持鉢意不悔出門非作  
客無全好因君當半歸社中能見懲早覓嫁時衣



有感

身外關何事胸中自不平竟無千日酒澆我百年情天地俄今古親朋隔死生蕭蕭北邙道風雨近清明

寄僧可鏡

鏡公禪坐處但到覺情忘動是幾年別端爲何事忙僧于孤易定花以衆成香最好清明後新茶待我嘗

獨酌

獨酌不成醉獨吟恒苦悲生涯渾在客死友竟爲誰飽我家常飯輸他國手棋逍遙無小大鵬鷗等忘機

舟中觀奕

權入三千浪枰開百二州幾行盤雁字一戰割鴻溝世

界浮家濶風帆坐隱收羸輸千古事誰問海東流

夜飲朱子山齋

出歿紅塵裡剛憐此夜談口逢知己放句恰古人耽看月休辭午傷春已到三浮生多感慨落落與慙慙

祝吳客卿先生六十

十年踪跡寄樵漁彩筆曾經冠石渠赤壁舟中蘇學士香山社裏白尚書字翻貝葉卿雲繞漏刻蓮花佛日舒自是稱觴多勝事春風絃管譯真如

長安道中新月

野寺鐘聲野客情簾痕喜見月初生謾誇京兆眉能嫵纔出春明眼較清茅店相依憐夜寂花朝欲近得天晴



音耶風形卷二二  
相看更待垂楊畔夢裡江南路幾程

送周恕行之越

感逝傷離共一堂觴行酒政肅如霜貧因穀日知農事  
老學梅花避衆香題鳳極知求友恕亾羊莫負讀書長  
只今披褐還何往玉價從來妬歲荒

濡須贈吳旦門

千章夏木倚窓清黃鳥相呼喚遠聲自是主人應勝竹  
得因吾友與班荆亂餘對酒皆兵氣老去論詩盡史評  
爲問武陵今在否好將此地報淵明

樵子歌

薄霧輕烟靄竹扉露華香透芰荷衣半生苦節居丘隴  
一曲高歌出翠微屐齒不嫌山雨滑擔頭帶得嶺雲歸  
仙人相見如相問莫道人間是與非

漁翁釣

華髮蕭蕭雪滿頭平生無計覓王侯百花潭上三間屋  
萬里橋西一釣舟短笠輕蓑烟雨曉白蘋紅蓼海天秋  
醉來懶把羊裘著怕有君王物色求

遊會聖巖

會聖堂開石作城多年浪跡漫經行蛾眉月自天邊畫  
崔舌香從洞裏烹巖上談棋歐遠法堦前竹韻陸陶名  
同君嘯傲清涼域今日追思寄友人

慈雲寺坐雨暮歸過方克壯齋頭值諸君劇飲時



音耶屋形卷三  
為克壯初度同汪偉長卽席贈克壯

雨出偏於物對宜聽殘僧磬下簾遲更經文舉開尊處  
便是裴休託鉢時我已確明生是累君應未向老前知  
憑將此意叅靈運爲趨桃花正滿枝

答幻度先生

半生多病半生貧妝點風流一種人約畧夙因惟好怪  
近來新懺在除嗔炎涼遍閱初逢我魔佛交叅等是親  
太史壯遊吾豈敢不甘蛙井竟沉淪

中秋夜飲

河漢微雲淡欲流開尊幽興轉悠悠嫦娥漫惜三分月  
宋玉俄驚一半秋桂子寄來黃正好秣田無歲白難浮

關山不盡平生意橫笛何人在戍樓

壽吳本如中丞

珠履如雲酒映嵐相看重理舊時談先庚共喜占年二  
雌甲何論避舍三綿上有田稱報母堦前種草得宜男  
平泉花石東山舞記取逢場著老憨

南中雜咏

次松陵  
潘氏韻

詠史中丞

獵獵朱旗映紫嵐劔光十里雪霜含中丞真有渾身膽  
父老時爲隕涕談馬上幾年無洗沐鷹揚一面護東南  
袈裟浮渡猶關夢暇整應知自老曇

浮山嘗有魔  
事賴公而靖

憶先師宗一先生



音賦風雅卷三十一  
惆悵玄珠隱碧嵐千秋熱血一杯含三生石畔何人到  
百尺竿頭憶共談爲法如旋軍袒左觀根先以我圖南  
祇今無可將塵刹是則名爲負老曇

### 與吳孔星

元規塵起失烟嵐孤鶴哀猿意滿含四海盡然何處隱  
六經以外幾人談識田有影惟浮渡口業多生坐汝南  
熟處漸生生處熟更從鄒魯問瞿曇

### 哭吳無咎

我輩如山解起嵐但從山起復山含平生大有胸中事  
究竟纔餘紙上談三傳雄文從癖左兩宗公案晚依南  
傳衣小謝堪相慰噓氣能回鉢裏曇

### 憶方小白

十年晤笑散如嵐靈物都教造化含求食無由爲鬼畫  
小白後脩文未敢信人談楚囚對泣憐江表汲冢無其子復也  
碑憶澗南偏是逃虛增感逝此間痛哭有羊曇

### 呈何相國

非時命駕向烟嵐賭墅安知意所舍洛下兒童皆有問  
山中宰相作何談關門羽檄俄從北銓部除書已重南  
靈鳥不聞聞醉象金毛五指仗瞿曇

### 過左子周息園

卽左侍御歸隱地也

泉聲幾派幾松虬十里香光杖下籌已到輞川知畫是  
更看裴廸附詩幽論交淡共梅言臘學道慳如麥望秋



別有隔峰消息在鷓鴣一曲石低頭未句爲亞三師也

春過大寧寺

山山爽氣與徘徊况在莊嚴七寶臺未許將心論不住  
且容以色見如來病緣有種當春發慧業如燈或夜開  
只爲荆高求懺度梵音都作雨聲哀

遊黃園

黃園二月草芊芊悵望東風自歲年漫向標題求館榭  
頻將水墨看林泉松如杜甫耽詩瘦石似劉伶中酒眠  
洞口一龕還供佛色空成敗問香烟

寄方爾止

人事天心摠亂絲高陽猶自酒成池醉中竟失雷驚耳

別後頻經火到眉避世貧無三窟想借君讀補七分詩  
憑將此意存公案尚似旗亭貰酒時

浪公五十

支公一衲老巖扉課靜時叅向上機已證此生原是幻  
未言今日始知非安禪石上雲同坐出定峰前月送歸  
世外交遊誰得似問難立度獨依依

答何令遠

白頭無可副春妍痛飲清言摠病緣人事盈虛如置閨  
支心甘苦自因年相看東野投金瀨爲憶西崑暖玉田  
枕上得承詩句好長門幽恨亦嫣然

贈朱西長四十



音賦風雅卷三十一  
二水三山剩此身歸來聊慰草堂春馮唐未及爲郎老  
鮑叔何堪對友貧得句祇因存甲子觀空無可避庚申  
麻姑眼底滄桑事但問樽前四十人

從李師游浮渡

諸天歡喜奏雲烟臺上清言曉更玄九品幸分蓮供奉  
三生愁聽石因緣澆人壘塊黃花酒見佛津梁白雪篇  
鼻孔文殊拈得出靈山一會尚依然

答友人作

猶記相逢雨意寒應門見報始呼冠友朋以外吾何樂  
文酒之間世所寬閒亦不無窮鬼力老纔知學古人難  
朝來伏枕方無事佳句清新得細看

寄何相國芝岳

賦就新看雁幾行平分秋色自明光雲泥未敢言同調  
甘苦相關在異鄉千里定知添警悟兩年不及論文章  
救時雅有長源癖暫領龍眠政事堂

同何相公歷陽除夕

王氣相迎雨雪遲官梅香倚燭花枝江城供具因民俗  
相國鄉心待客持歲不與人天有老愁能隨我地無私  
未知白髮還公否大抵星星自此時

自壽

是詩也成于丁亥之七月二十有九日是爲予  
七十初度也時在濡須之鐵山鐵山者予友吳



汝爲讀書處汝爲諸兄弟爲置酒召賓客甚歡  
客之歡終不足以釋予之悲故有是詩詩之所  
以名自祭也祭之名生者之施於死者也故事  
皆當有言時從予者獨予孫兩京宏季則予言小字  
固卽以代兩京子孫之用此於父祖者禮也亦  
卽以代汝爲朋友之用此於朋友者誼也皆以  
述其悲者也昔有人問蓮大師得了死生否師  
曰出家三年已了生死所未了者名根耳予嘗  
深念此言自祭之名昉于陶先生淵明淵明之  
言人生實難死如之何真爲達矣其言自予爲  
人逢運之貧貧豈足累先生者但拈一貧字得

無與幼安揮鋤之意便小一塵至先朝何大復  
臨終語其門人有我生多辛苦之言先生得年  
三十有九何以不及死生也嗚呼此兩生皆千  
古高士文人其廓然生死者如此而獨似不能  
盡置貧富盡置其苦如予平生所歷兩先生又  
萬不足盡之獨大運之傾始於名場最予所深  
痛雖足跡遍四方而姓字不出一室槁死草間  
於予自足顧雲栖聖人且何以處我哉客之歡  
不足以釋予悲廼予言之悲遂足以盡予心之  
悲乎予雖未死其去死亦復能幾時兒輩皆失  
學不能言不知青蠅之外有吊我者何人予心



音耶風雅卷二十六  
之悲不盡於予言而或得盡於不知何人之言  
卽又代予言矣夫所謂不知何人者必有所謂  
可知者爲之導則汝爲兄弟是也

大事未明憐此日古人祈死是何時友生好我能張飲  
老子貽孫更有詞聊擬陶家爲自祭敢將虞子問人知  
有情應怪天難老無諍憑叅地用卑世自一壺爭貴賤  
我經三鼓識盈虧到頭是味皆成蠟轉憶初生得擬麈  
正值聖人方在宥欣逢道者詫岐嶷三生石幻緣難結  
八識田空慧有基浪說明朝如掌果透觀重戶若琉璃  
予兒時或前知數日事嘗臥中遙見舅氏吳從齋坐門  
外先大人怪之時隆冬天未甚明急起驗之果然凡隔  
重垣路以茲大父虞蘭脆反較群兒後管窺  
百步也  
予八歲始授書

藻未從文選入受經已對尚書疲嚙談自此時通史駢  
語因之偶入詩謬想玄黃前有我習從青紫外詢師縱  
心四部良無畏學步三塲亦不辭牛鬼蛇神聽部署天  
吳紫鳳任歲筵錦分散騎嫌經剪玉簡平原務盡玘公  
子投竿須用海將軍置陣必臨泚執及自詭爲王導肯  
播尤懷畢父糴質業無時常傍竹課工計歲視栽橙能  
爲左傳何妨癖不讀南華未盡奇先大人有南華癖予  
童子時節經指授  
禦寇風疑堪傲鷁壽陵步豈得超夔此書政復何須注  
卽事隨拈竅在疑未及藥成爐遽圻共傷薪盡火仍貽  
龍門有恨書需續犬子迂情病復支起色欲徵金液幻  
枯腸還被石田欺天倫繾綣因游少世法生疎與性岐



閉戶徵心恒歷歷論文同氣亦惻惻幸便令伯為兄快  
始信宗文仗母慈誓日共為萱草色驚飈忽折紫荆枝

舍弟陟仲才而天子常前禱于關廟願為之代會祈漢壽靈無應擬與王猷算

正比七尺精亾仍苟在多生障重固難離深慚鬼錄垂

三省轉向人間嘆百羅朝氣頓銷憑見獵昔賢如對只

交綏肯為童子因人熱得不孤軍見敵罷以此讀書多

外傳但言服藥憶中醫予與仲皆善病自行求避債臺

安得為賦無衣人是誰因悟編摩皆係福恣談遊覽正

須貨後車偶托平津契何相國五岳因諧向子私客已

散梁尤寫鴈婢能蔽魯欲原龜黑陵檜柏神靈集青嶽

雲霞造化為七十二家無掌故三千諸子尚壇壝携愁

更踏長安道乘輿曾窺太液池民懌兩篇稱玉府衡山

十首亦珠麗文章隨世仍相和俠節何人許更追易水

衣冠千古見薊門壁壘四朝遺薊門邊城堡皆營自

頑凡經四朝金湯屹然予嘗游其地因得金臺吹律等跡金無樂教聞風至律憶鄒

生冒雪吹天語竊從東閣悉捷書幾見北門馳誰人為

漢陳三表何事如齊有四維雅坐口窮深自艾可禁心

嚮烈如葵當杯尚斥金盤露持論寧輸鐵蒺藜錯智弗

遑晁氏計劃謀先為魯人危總緣秘枕承鴻寶豈必高

冠著駿驥詎意竟成戎馬識無因闌託史魚惟史相國道隣

此公真有愚難及相士偏能誕是諮頗為窮交籌米價

忍勤廉吏作檀施雲泥偶共三年事桑海俄驚一劫移



兵散二陵無蹇叔塵飛四面合元規雙龍竟謝司空佩  
八駿終爲阿母羈席上憑看茗事酪釜中試聽豆呼其  
村烟也學孫家竈野火如爭項氏祠安得圖書皆入壁  
小爲語笑亦須著虛疑政用論兵失畢竟風從識字靡  
秩秩廬陵丞相第翩翩中壘大夫兒昔慚徑借終南捷  
今羨舟經灩澦歆療鶴何由人得血殺牛亦任我爲尸  
金銀仍有彌天氣香火全無隔宿唯辨變履書嘲屬國  
事疑重幣贖文姬榜花譜映齊諧志視草文高石鼓碑  
凌厲燕臺俱是驥保全昌邑不如鴟英雄何處歸吾穀  
廊廟當時有將戲十日橫爭朋字正百身何救帝圖隳  
顛端瑟瑟風方始蕉底情情覺已遲不在我前真自悼

何關君事與人畸苦裏似共窮爲約勝事偏于老不宜  
建業水并空託鉢龍瞋莊在未沾犁豺狼作伴經千里  
鷄犬同歸共一壻人鮮瓮中圖骨肉昆明灰裡縛茅茨  
君臣蜀國鵬相弔伯仲金城柳在斯逐日霧增工部眼  
連年雪漫子卿脾鷹揚以後無興渭狼戾何方尚擬郿  
漫向葛衣論世態從來敝袴計功差皮囊作祟能無待  
般若爲糧倘不訾曾有一人從翰苑先師吳客卿先生也爲拈五  
色出摩尼浮山風月開生面遠錄機鋒見豎眉解後三  
三無異帶著前六六是枯碁因張末法先空觀爲度初  
根用忍持勇猛首遮明日埃慈悲更展隔生期先師宗一論云  
勇于立志者不敢懷姑待之心去來不過爭彈指淨垢  
深于立志者不敢忘明日之計



胡為任朶願慧業反憎靈運雜行門須印普賢悲蓮花  
 漏為光陰惜具樂文緣懺悔提居士門庭原澹泊如來  
 鞭影在離披遷三痛負深陶鑄噫五遙憐舊唱隨夙對  
 見尋聲赫赫童鳥相望塚纍纍眷屬經亂死者甚眾如  
陸几五孫多以餓死小陸但甫疑筍隊旋來如何處蘭  
得一升米可救而不及悲哉益可告飢只似隨緣同傳舍應教思過向崦嵫放言昔  
 豈容呼駟反舌今疑可貸鵬德遠獄翻平鬼責予讀宋  
解張魏公之為人頗深弇州夢斷見吾衰平生數夢弇  
求之今與相忘大遺矣擁書只當逢絲管博古何從辨鼎彝眼底笑看三豕度  
 胸中穩貯八蠶絲是非有說憑臧穀工拙無端任惠夷  
 話到聲華俱露電算來遊好幾鍼磁津津尚憶論心燭

落落都成折脚禽孫子來能同噉麥

出入窮愁急難數十年不相舍者孫

卓卿張郎死不負名芝

表弟張芝字仲英亦生平知我一人高才盛氣奇蹇無年異

同左右皆為手存歿春秋摠在皮玉塵尾埋良可恤靈

光殿在亦難楮間吟杜句寬兒懶備述符姨助婦癡但

問品題移小草莫尋滋味到烝梨偶臻小悟因知歇時

抱幽懷欲有遺最愛延陵人奕奕即看河朔事孳孳苦

嗟若在投金瀨豪舉應標瘞鐵陂

鐵山為魏武埋鐵處魏武武為

今日急米顛顛被昔人唾

米嘗官無為遺蹟甚眾

足明別調時時

少况復窮人局局曦踏地跼天尤叵測浮家泛宅果安

艤降心久借却鄆枕下酒何消博浪椎靜理定能靈肺

腑喜神端可潤威儀兩端從與予無分百歲應惟命所



司寅忝靈均為共降甲方中立取無雌予生萬曆戊寅其時為甲寅  
種松成嶺邨常任編竹為棺不誤伊今古輓轡書甲乙  
人天階級鏡妍媸官中漫作襄陽約島上空為履道治  
欲學無生知不易也從一滴學無涯

戲作五首

世無武陵漁安知秦可避桃源雖不開祇園幸不開  
十日並出時后羿亦何神舉頭但一日六國莫支秦  
恒河沙數眾無淚餞崇禎如何臨赤土怪他天眼晴  
不知中國中佛定何時有便却淮陰侯得先見佛母  
激龍當以虎誰能入虎穴如今封使君正擁旄仗節

祭脩慧

才及十齡身倏忽却于七字意纏綿在時曾讀書多少  
文字緣深父子緣

四十初度有感

浪裏回頭四十年一生撐盡闖風船于今已是隨風打  
船到江心任老天

有感

為孫夫人作

種得天桃一樹紅為他愁雨又愁風東籬不聽金鈴響  
輪與陶家解事翁

祭九如

舊鬼見尋曾有說無言新鬼倍傷神情知來意饑相告  
其奈仍當乞食人



杜鵑二首

夜啼可似晝啼情屋角長松借汝清歸路應憐予未徹  
相邀常不過三聲

人情寧與汝情通若箇含情在谷中只有昭君歸夢切  
可憐不度未央宮

茶花

西施俠節容遮却逸少文心字掩將恰與此花同一命  
世人只解較旗槍

題丁蘭廟

秋風江上客衣單天路何由借羽翰一日三公無換理  
憑將此意問丁蘭

題赤壁

黃州夜月蘇坡艇赤幟秋風魏武旗摠是當年親見事  
江聲便是感懷詩

哭猶子西曙十七首

海上飛來一字新海風海浪失根因但將家事參天意  
事事堪疑此事真

一家猶在夢魂中信到江干獨我逢應是多生爲骨肉  
蜀山先報未央鐘

何病何時忒渺茫招魂有賦向何方吞聲欲下昌黎筆  
此恨難同十二郎

賦成幾得叫天闈偏以脩文去者繁地下論才超六代



音耶風形卷二十六  
時時上品選寒門  
建業城邊一醉呼  
幾年消息粵耶吳  
西來萬里長江內  
寄有懷鄉淚點無  
脩文地下已經年  
消息才從萬里傳  
飲酒讀騷千古事  
從今刪却遠遊篇  
天外蒼蒼更兀天  
浪魂何處叫荒烟  
一腔正辦慈烏血  
可得餘紅化杜鵑  
自提斑管卽昂藏  
兩度剛腸見悼亾  
若得多情同奉倩  
一杯猶得衆鴛鴦  
文字漫誇巴蜀檄  
聲名敢問會稽章  
一杯欲乞家山土  
如望瑤棺下帝旁

曾上珍珠海客船  
可能一粒作家緣  
他生得托烏衣巷  
死價猶贏百萬錢  
家學稍於史傳優  
時時卽事有尋求  
如何各爲浮情誤  
竟未深談馬少游

憐予薄福得長年  
萬事紛紛到眼前  
因悟不緣情字盡  
何人敢學做神仙

四海彌天氣自殊  
不知絕筆有書無  
毫端字與胸中淚  
一一憑添合浦珠  
兔耳山前泣落花  
女兒橋復嘆空華  
憑君慎作揆環想  
別覓襄江太傅家  
家世因緣分草萊  
五言八韻卽人才  
東陵瓜地寬何許



得比黃臺摘幾回  
言人歸時人木東  
到及此東可若  
總角荷衣有雋名  
但看落筆見才情  
向來錦段還餘幾  
乘夢來分弟與兄  
孤懷應自衆香來  
只似襄陽咏不才  
雪窖冰山經歷遍  
到頭却作嶺南梅  
寄方小白

春菜  
春盤細剪碧叢叢  
消息于今鼻觀通  
却憶平生孤負處  
木樨花下海棠風

哭張仲英二首

劍躍延津終得侶  
琴辭王子頓亡神  
將爲劍化爲琴在  
可想人間活死人

荆高以後酒人劣  
汝共方郎素心  
欲造端何事未逢燕  
太子便爲我輩換衣冠

漁父

籃裏無魚欠酒錢  
酒家門外繫漁船  
徘徊欲把蓑衣當  
又恐明朝是雨天

贈段山人

博古圖中見鼎彝  
囊千金一擲爲耽奇  
不知誰是波斯眼  
解定淮西第二碑



贈何次德

自笑狂夫老更狂，但憑機穎避三郎。我生定辦荆軻事，不比當時得舞陽。

偶題二首

京兆雙鸞久逼真，成都十樣又爭新。菱花照裏成惆悵，付與東隣二八人。

錦幔金幢隊隊開，三郎閱伎上歌臺。十三絃裡聲何壯，好避花奴羯鼓來。

白感

鴻雁無家春也歸，堂深燕子傍人飛。頭顱帶得江湖雪，仍是桐山老布衣。

龍眠風雅卷二十七目錄

木厓潘 江蜀凜輯

吳門沈旦初翔生

叅

同里姚文燹聲侯

王杰

四十四首

李文華

九首

何應璿

六首

吳用鈐

二十四首

方若坤

四首

盛氏

四首

方若素

十一首

汪百谷

二首

趙連城

二首

方叔猷

一首



龍眠風雅卷二十七

木厓潘江蜀藻輯

王

杰

初名卜字不疑萬曆末諸生已更今名號廩坊以所居城西西北隅為魯子敬指廩舊蹟也家素貧分產給諸昆友愛最篤居恒有志用世嘗謂子弟曰經術所以經世務此外復何事乎公天性磊落所著天耳堂集皆崛強自好獨出手眼士林爭推服之購請詩文者趾相錯也又遊于鄉先生方文季葉文莊兩公之門問學淵凝才力橫鶩歿三十年仲子天璧率陽毅為刊其遺稿行世而關中曹中翰玉珂為之序詩古文皆百鍛千鍊特有真詣其諸古之振奇人與

方斷事公幽忠錄

高天黯春陽郊壇禿緇鬚吳鐘咽不鳴蜀土血漬涕川

岳聲氣匄英靈孤光細身沉名冷然蛟螭怒裂背百年

弔汨羅讀之陰霾霽



笑哭篇誕日自壽四十三韻

翁歸文若武省華子若父富貴材偏成單窮偏鈍魯六

忽江左六朝風王謝驕門戶地軸奪天鑑宛如夫畏姥

得靈簇冠纓人傑衣無組滿城里鳴珂而獨倚市賈青

青一子衿蟠桃花乍吐哭門魯褒錢謂兄於今兄作祖

滿城累金穴而獨壁四挂哭家二十親久伶仃十謀九鹵

莽哭厄三行不採朝堂姓不挂畿輔哭各杖履懶送迎米

鹽任散聚面鐵愧易汗腰鐵強難俯哭傲五六月毛髮寒

生事暗盲瞽弟三赤手拳兒三黃口乳吾似曦東升何

時耀亭午高門廣田園列騎操鞭弣子戚占世間纔容

登牒譜而吾六痛哭一淚一場雨唐皇闔鷄年何堪出

脆肚唐宗崇慶日何堪設膜脯八字未安排何勞排八

股髮短心髓枯勿藥焉知瘡哭仲兒發狂言六哭爺

何取六笑笑其哭戲當斑斕舞門衰清白貽比隣勝德

宇王謝在筆腕楊廖來丹腑家乏昔曾饒近且粟充脯

仁儉煉鐵石賤貧天缺補遇厄屈蠖伸名微伏雌鼓疎

傲龍性昂愁病鵬飛怒骨肉皆虬螭男亦跳地虎我聞

拍案叫口海成笑圃睂山名二子吾亦知諸豎才可木

向榮志非草同腐芝蘭已根荻晞露各有主侯封萬頃

田廟食一抔土朝奪文章標暮記功勳簿千秋壯業牢

百齡童顏古庭前種槐人槐黃秋自睹吾健骨稜稜自

壽期莫數卽活七十年尚能二十五



宴三學師於西山老君殿

雨山似醉晴山醒日脚翠微珊瑚影道院香空融氣紫  
仙來函谷關中子薊北風烟淮南水一堂西爽都清矣  
松濤呼起蓮波笑其中浩歌當長嘯薜荔無陰寬晚照  
中秋出闈遊吳開府園  
投筆問園林清疎御史心周遭千景好髣髴七篇深松  
石僧同古花魚鶴太淫不關今夜色池老六朝陰

畫船秋月

萬里星河白那應坐樹樓只須平舸小宛在上方幽蟹  
陣鋪燈面蟾光接埠頭最貪三五夜不寐學垂鈎

許開府案石

公昔紹興太守

鬼斧何年琢奇供御史丞檀香雲出岫蛛網石鋪層土  
繡從靈璧冰聲似紹興水晶融五色知有補天能

上何太常二首

聖治宗東魯賢門世大夫功名纔百粵禮樂又三吳銅  
柱標如馬金甌覆是盧青氈王子敬坐閱縉紳圖  
大小桓君號曾傳漢太常公偏超綠綬子復盛青箱衣  
履如鵠序簪纓定鴈行豈關師訓力家有辟雍堂

時仲兒天

壁下榻太常家訓其二子

九日

節到秋何晚年當老亦豪畏風頻按帽防雨早登高亂  
後鴻留陣荒殘菊帶蒿酒腸饑未損膽氣敢題糕



鶴浴

何處羽衣客飛來冰鏡中細翎融濕雪朱頂潤明虹素  
影人間水高情天外風若教盤遠勢清露舞虛空

白下歸贈吳漢章聞日唯

擊楫渡江南歸來伴又三筆殘仍噴彩衣老故拖藍雪  
浪江吞盡風霜菊戰酣一番秋氣概只與壯夫談

西天寺聽齊員倩琴

翛然僧榻畔人共七絃清對月聽經意臨風作譜聲彈  
教花雨落坐覺水山生安得蓬瀛處隨君弄鶴笙

橙山訪汪大年

入疑霄漢盡彎處忽鬆開秋野丹成片陰崖綠自堆舞

鴉將客迓唳鶴似兵來丈石高無恙山靈許共陪

福興道中

海盡盡奇峰園多荔與榕日晴惟雨夜雲暖不寒冬塚  
久偏多貴田開始見農但逢佳麗地林氏已栽松

雲半間

一間僧屋半間雲還讓青氈半裏分燧火然燈諸物候  
石泉洗硯照人羣蜂鬚釀蜜香能惹鹿角披衣膩欲紛  
鐘漏不知何處盡滿空天籟獨先聞

來爽齋

爲園三畝屋三椽不放簾時萬里天林雨瓦間敲碎玉  
石苔月下繡連錢畫成西嶺來春色報到投山出暮烟



十里青溪楊柳綠黃鶯都在鷺鷥邊

寄葉太宗伯老師丐予詩序

時為南雍司成

草茅何以上巒坡京邑文章舊價多

師昔貢選南雍

自到木天

欺樸遯又來花雨沐菁莪壓秦王氣金聲賦擁晉風流

白眼歌說向壁橋新弟子吾曾冠帶此婆娑

一聞邑侯臨生社諸先達陪集次吳宮論韻

一水無絃響自彈冰心到此共清寒幾多皂蓋漫天礙

猶覺蒲團片地寬不夜有心臨彩燭無風自霧出香檀

疎鐘斷處清歌發半是騷人半達官

秋日同殷梅源孝廉聞警

不堪秋字亂時聽塞馬初肥劍血腥藥裏寒溫成慘淡

詩中平仄失勻停黃河未漲思春雨銀漢無氛望曉星

酒到得君揮筆陣龍蛇聲勢帶雷霆

史進士監軍

兜鍪粧點進賢冠半壁乾坤借一擔進士兵書猶自讀

將軍戰字不須談杯中月共啼波燕劍上星將血海含

欲挽銀河無洗處蝶隨花氣過江南

答杜德機

酒間索句笑難應詩豈君家杜少陵鐵鑄俠腸羞傅粉

珠懸慧眼識傳燈酒如李白澆三斗墨似張顛洗數升

一寫不知吟下泪原來字染血成冰

梅花次高啟韵二首



瘦疑僧老澹疑仙韻與騷人趣作緣黃菊曾留酸澁雨  
絳桃未破囹圄烟娟娟紅白遙江外隱隱青蒼古峽前  
自入羅浮清夢後陰晴不惹百花天  
暗香寧許蝶蜂知地老池荒出一枝洗霧瓊姿天共色  
撐霜玉骨月相思粉粧鶴唳更殘夜信報鶯歌歲早時  
化作美人林下見自然標格過於詩

白燕

斑襟紫吻任尋常縞素偏宜玳瑁梁穿入玉釵纔是夢  
舞添紅縷不成粧波紋翡翠機梭淡箭尾茨菰剪練長  
語似舊時王謝認海風吹卸皂衣裳

竹醉日遊燕子磯夜還宿蘭若

每望嵐陰未到雲到時同竹醉南薰不堪道院迎仙客  
何可僧房少此君畫舫難描江上彩青娥爭賽水中紋  
笙來簫去喧明月受用清鐘略幾分

遊石洞菴

老健登山不杖藜廊梯穩步更樓梯夏秋風轉雙吹入  
南北天交一望齊燒盡劫灰高結寺鑿開石乳溜成谿  
故鄉指點猜何處江窄雲寬樹影西

訓孫

十載兵凶千里客冬寒况是老貧儒地遺寸白晨梳髮  
關亮微紅夜擁爐痛父望兒身內切登官拜將眼前無  
平生未了知誰補手撫孫頭笑復吁



喜仲弟參軍歸自定遼

昔因燕圍幸賺開松山城破又偷回皇恩不屑山林歎  
官况先拚驛路哀行處魂應護劍到時兄手忽鬆杯  
天涯骨肉何緣聚喜轉如癡作夢猜

吳子翮山房呈其尊甫先生青芝太守

君問山靈借翠微啼麋舞鶴共忘機不知吟客思多少  
但問癯仙影瘦肥楊柳鶯喉晴噤啞芙蓉燕尾雨依稀  
曹公倘酌青梅酒可數英雄到布衣

菊花限九佳四十一韵

一味冷官街一藜開客齋低枝或掃逕奇榦欲摩崖五  
色開玄帝千年煉女媧香令檀麝穢粧覺粉脂指六尺

高逾嫩三分媚已佳蕭疎天自好寂寞地偏諧靜對應  
疑俗歡呼不用俳畫宜皺灑落詩忌調淫哇老圃寧嫌  
澹新時只恨乖未逢春色闔却傍晚陰捱朔氣初生楚  
寒光遠在淮蒲根鳧陣陣梧葉鳳喙喙淚濕霖霖雨腮  
疑點點霾華芳霞暈吐瘦影月痕又近夜留餘蕊藏冬  
煖剩菱蛛絲芟玉塵蟲蠹剔銀釵風戰撐將竹霜欺護  
以柴移株須粉鉢分種各牙牌盛友尋唐士名姝比越  
娃古稱真隱逸世賞盡徘徊北海尊多酒江南菜有鮭  
朝餐木蘭並秋採薜蘿偕忽到過頭杖還遊軟步鞦隨  
緣閒玩弄好事巧安排似舞黃皮鶴爭來白鼻騮始知  
方外侶正合物中儕爾艷無蜂蝶吾狂任虎豹爲朋聊



音學風雅卷三十一  
伴鳥有屋僅眠蝸遶戶峰相亞臨池水自涪東籬饒景  
候西畝足生涯携子看芸草呼奴拾稻蕪問予何所樂  
觀此卽其懷桂子嫦娥遣荔奴中使差豈如君子境常  
是主人皆白露清爲骨黃金散滿骸錦茵諸彩練錢朶  
幾緡緡濃映千蓮燭孤凌萬樹椹愛惟元亮獨騷與屈  
平皆原憲貧非病劉伶醉可埋幽人知己者花譜咏模  
楷

指廩坊

富貴交中見英雄亂後尋而今多長者只換指困心  
夜

空月似無天松陰閒自引西風東北南那得秋聲盡

送友人試廬陽

昔我飄零兩到廬詩脾泥足雪風驢五陵裘馬鞍頭笑  
花匣綾韜展四書

新月擬古敲梢交韻二首

聽得吳剛鬼斧敲廣寒偷斫桂枝梢致令桂魄無全量  
晦朔連宵補不交

素女疑將銀燭敲燭煤雲影畫眉梢十分黛色三分淡  
兩朶蛾痕一朶交

亂後喜遊

雨春長得避兵蒿有犢多因是賣刀紅杏恰來鸚鵡嘴  
綠楊都上鷺鷥毛



舊記一飯十六咽病中手書之

不卧捫心對藥床痛酸都在此中央吞刀緩忍忙書記  
好取兒孫淚幾行

訊仲兒襄陽邸中

二千里外斷腸情只候吟聲與笑聲消得一行書上事  
夢中白髮黑三莖

七夕友人之六

野堡荒灣我舊過今朝不合唱離歌晚粧樓下人猶去  
豈有天孫肯渡河

舟夜二首

睡過江東無數山醒時忽笑水天間一江詩思隨空去

題遍菰蘆幾個灣

聽風最喜激聲流槩擊空明蕩不收掉破武昌魚子浪

蘄州春色在黃州

自皖城回示仲兒

老去重來未可知衆山相送似相辭少年赴試消魂路  
今日吾兒半笑時

曉聞吳歌

夢裏吳歌作楚腔渾如兒女語雙雙此身已屬蘇州月  
夜半何緣到皖江

小孤阻風遊石鐘山

東波曾試水鐘鳴我怯鐘鳴浪阻行兩月從無風一順



等閒消得逆中情

李文華

字質卿號芝石崇禎間歲貢生家貧力學教授鄉里所入館祭嘗以明宗黨之寔者天啟甲子赴試白門有友人父子卧病僧房為延醫療治之既子痊父歿經紀其喪遂攜孤扶櫬歸不踏省門其敦尚氣誼如此所著有清音集

奉贈何相國歸田

煩躬辭北闕畢志赴西疇致政緣明主歸休戀故丘  
堂開裴度野瓜種邵平秋日夕江鷗至偏隨畫舫遊

秋前二日懷王玉鳴讀書靈泉寺

溽暑侵衰鬢高齋繫我思溪迴清溜冷嶼寂綠陰垂  
鳥語窺朝帙蟲吟響暮帷最宜秋月近皓魄倚欄時

寒月

朦朧雲際月淡漠樹間暉窺影霜威肅驅寒酒力微  
簾開清襲幕徑轉冷侵衣何處疎鐘至淒聲入晚扉

對雪

冽冽寒威迥空齋隱几時亂風飄雪片昏晝吼霜枝偃  
蹇生涯薄淒清病骨知蕭然徒四壁孤詠少陵詩

過朱公墓

望望名賢跡樵人指碧林荒墳經雨斷殘碣隱雲深  
漢代循良政桐民遺愛心甘棠應不遠謳頌到于今

一夕夢中有云山中怡老白雲層因成一章

久欲買山恨未能山中怡老白雲層饒他萬里乘船客  
輸却三更入定僧結宇依林堪獨嘯攤書選石便閒凭



千秋不分商山叟猶起當年羽翼稱  
入燕中別胡鶴鳴中白

天涯分袂思茫茫偏惹離情憶故鄉  
驛路雲山欣並轡  
薊門風雨喜聯床心搖別後花頻放  
目送歸時鴈幾行  
過我草堂偕二子莫辭把酒對疎篁

春日同許胤伯諸子登鎮皖樓

危樓峻絕倚江邊極目風帆春景妍  
汀草離披迷檻外  
楊花歷亂舞尊前風吹梵響諸天靜  
雲繞鶯啼孤塔懸  
醉倚夕陽歸未得最憐漁叟宿殘烟

懷瓌山甫

溪掩柴荆獨委蛇白雲縹緲繫相思  
劍光射斗曾占氣

璧價連城久待時銷夏綠荷舒淨沼  
辦秋黃菊倚疎籬  
同來顧我西窓下好共論文酒一卮

何應璩

字子政方伯虛白公之仲子生而淳重不為深中多數少穎敏每旦能受七莚比長偕兄

應璩同居友愛如見時應璩死無子遺言以田產畀諸弟公一切斥去不問從父文瑞公秉國鈞公督家政有魏遺皆封識無所苟嘗從鮑泰輪先輩倡導怡園之會同社生馬慈襄死為執紼引匱哭之盡哀有范張遺風晚夢異人授以石視其鐫乃淡然若石四字遂自署淡石居士有據梧軒集

山中小蘭若

竹根連蔓草轉路入蒼藤地古多奇樹  
山深有老僧樵  
青蘿逕及春瀑水田崩自有禪堪悅  
何方是大乘

岳少保墓

廟是黃龍府燕雲一望深千秋三字血  
一片兩宮心遺



事田夫說荒碑野燒沉春風吹湖水如作渡河吟

亂後寄江外友人

亂後浮家異相思寄碧筒雲深山色暝石靜野烟空戰  
血腥秋草殘陽急斷鴻年年二三月時有可憐風

田間晚穫

蟬鳴秋雨霽晚景足田桑故草抽新綠嘉禾曬淺黃占  
雲蓑笠苦對酒韭萍香野老閒無事當門看築塲

粵東別張鍾陽按察

南方瘴嶺淨風烟共羨張君為政年防海預嚴合浦市  
泛洋先禁廣州船荔枝紅映三春雨梅子圓齊五月天  
幾曲飛觴消永晝那堪茲夕是離筵

晚登邗江郡樓

江濤渺渺送寒流倚檻風烟一望收對楚遙吞湘浦日  
憑吳欲鎖海門秋騷人詞賦留殘雨估客帆檣夾暮洲  
燈火萬家蘆荻亂不知何處訪迷樓

吳用鈐

字士衡一字逸民廷尉玉華公之冢子七宗  
禎間以父蔭奉部檄謁選聞母言馳歸哀毀  
骨立塑父母像設於菟裘日以侍二人于泉下也  
桐羅冠患諸從或饑寒轉徙割產界之無德色手  
輯大全蒙引諸書菟林稱之

題東南從父水中雁字詩

作詩如作人各自有本分文士乏沉雄武將少雅韻此  
是天所為全不關學問從父丁盛年卓犖觀古訓舞稍  
桓宣武按山謝靈運析疑賞奇文抱璞隱孤憤丈夫謀



千古詎肯規淺近五侯與七貴延致貌不應生我必有  
用寧惜床頭罄西山朝爽氣悠然豁麋性時宜合未可  
臨流動清興賓鴻依候鳴矯矯排筆陣傷秋客先聞委  
波人不定感此羈旅者慨慷唱南詠詩律老纔工藻思  
窮益振雅韻兼沉雄兩兩堪持贈一時文武才惆焉皆  
後矚賈胡喜欲狂海舶不勝競願爲剖腹藏光怪恐飛  
迸囊處穎立見聲名走不脛

病紀

絕粒浹三朝猶如日再食枵腹而果然強起循床立跬  
步卽須扶坐卧皆無力氣息僅奄奄髀肉已全失妻孥  
過我前含淚不忍滴好我時見存聞之爲股慄我生乘  
大化來去何欣戚如此多設施天公亦不必因憶大廷  
尉辟穀者六日含笑逝繩床身不著院簣輾轉似我今  
卽不肖之一

宿銅井戴質公精舍卽席感賦

路轉車門廊曲曲高軒內有深深屋主人倦讀偶開關  
憐我襤褸聊止宿鷄黍深譚夜漏遲酒酣耳熱一題詩  
身經多少滄桑變話到滄桑淚滿衣

宮諭何省齋案頭看甘仲美硯

彼美人兮在空谷端溪百尺掇紫玉叩叩空空若球琳  
龍蛇驚走妖魅哭探得一枚或兩枚抱出重淵笑可掬  
慘淡經營盤礴時如磨如琢聲相續隨形肖象多巧思



務令石理完其樸木天清几列紛披古製新裁競相逐  
所恨南宮不見我袍笏拜之應僕僕予才疎拙似荆公  
溪慚巧匠鑿山骨

孫隨印學博魯山少司馬王願五太史陳默公樞

部家仲水部郎湯日朋尊相邀看披雪洞瀑布

歸經默公滌岑樓復泥飲達曙卽席口占併寄

披雪地主盛雪樵上林

巨靈怒展劈山手鐵壁雙開萬仞陡中有銀河一線通  
靜日只作蛟龍吼瀑布那從人世來披雪祇應天上有  
峰頂峰腰芳樹多老猿接臂數經過珍禽無數難名狀  
蔽葉窺人似擲梭爆竹一聲驚飛走前路况復喧笙歌

羈人旅思消何處狂嘯爲君傾叵羅暝色寒烟相與劇  
罡風陣陣催遊屐金勒玉鞭馳後先別墅濃陰森肘腋  
濟勝之具喜有餘競上元龍樓百尺主人愛客客忘還  
顧曲敲碁永夜間殘醉莫辭新醉續城裏重看城外山  
却憶披雪洞中樵隱者曷爲匿影峭蒨菁葱間

七夕同朱開之吳衆香呂日章分賦故事得東方

朔

元封元年七月七天子齋居宮禁密承華殿裏晝無塵  
延靈臺上風吹日想像仙真欲見難歛有青鳥來西室  
離離喙骨相姝舉朝錯愕無人悉滑稽侍從東方生  
自言天上長遊俠吉雲五露琉璃青芝田步景雲光疾



那邪汗杖幾枯榮鏡火明莖屢軋苗憶昔經過翠水滄  
玉闕承霄迥萃嶽紫蘭宮侍王子登別來千載成異質  
朝朝暮暮瑤池飛肯填銀渚渡靈匹阿母會須暫下來  
將翔將翺肅警蹕麟駟龍駕雜喧衡百和九光仙儀秩  
琅璈湘磬薦天厨阿環通訊懽未畢庸主對坐非仙才  
靈官嚴車不可尼始信先生豈凡人從前相對徒相失  
臣饑欲歿應自知一十八年笑狂獍丈夫骯穢都如此  
白龍魚服悲蕭瑟何當掀翻天漢波淨洗世間肉眼漆  
歲星光芒萬丈長射令俗子寒慄慄痛極蒼虎歸去來  
年年七夕挂雲霄

蚤過礮礮

苦酒澆愁愁難掃寒燈無燄玉山倒酒醒燈盡夜何其  
雄鷄一聲東方杲咿咿啞啞櫓初搖旭日流紅穿牖早  
磯獰湍急颺不留舟中無聲暗祝禱長鬚把舵勝長年  
始信江湖余已老

獨山湖阻風

石尤巖水氣淒緊到虛舟黃熟梅初夏青寒麥未秋潦  
多知赴壑山獨不驚流對此理孤緒飄飄似倦遊

暮秋理歸櫂

正值秋容老行行客思賒江湖一蕩子京縣兩浮家岫  
遠雲添峻楓丹松映斜因知歸去路是處有烟霞

峽山道上口占



十里峽山道山陰定弗如朝嵐相映發竹樹暗扶疎怪  
石迂前路奇雲隔後車桃源卽此地吾意老樵漁

贈鍾伯敬儀郎二首

海內文章伯翰君久擅場登壇南國士典禮盛朝郎家  
學竟陵體人傾通德鄉我來時握手潦倒興何長

生平傾倒處只在楚雲邊沽酒憑文價看山損俸錢每  
揮名士塵時共幸廉船

時與友  
夏任還

深幸延陵子頻來問艸

立

曉冷

曉冷秋衾薄霜鷄送五更數櫺留月色一枕受鐘聲聒  
耳窻蠅亂驚心簷雀鳴却憐多病眼炯炯向天明

寄淝水令熊公遠

豫章才子江陵俊鞭弭相從憶昔年展倦石頭同作客  
烏飛金斗獨疑仙已知白雪輕城壁還許清風折俸錢  
爲問鎮淮樓上月可容分照到龍眠

訊耿師獻甫

不知絳帳近如何戎馬年年轉徙多家比仲容惟犢鼻  
人同甫里只漁蓑惜陰亭上攤書曬避世墻東扣角歌  
門下貴人今秉鉞斜封白絹慰烟蘿

三山姚家園

參知舊墅枕江濱舍權幽尋向晚曛石上荒臺蹲老柏  
亭前小沼漾新紋平疇香稻當窻滿古廟疎鐘隔坂聞



熱客乍逢清美蔭可能不待月紛紛

賦得滿城風雨近重陽寄懷石生兄

天高風急雨霏微此夕年年客憶歸紅葉翻堦聲歷亂  
青燈綻蕊影依稀倦遊自笑空彈鋏忍凍誰憐未授衣  
爲報難兄多藝菊遲余九日欵荆扉

送明經方爾唯北上公車

醜酒新亭送客車今朝去住各天涯二千里外紅塵路  
四十年來絳帳紗虎觀譚經風滿座龍墀射策筆生花  
相逢擊筑如相問爲報園成五色瓜

金陵懷古二首

一曲歌殘王氣銷臨春春盡草蕭蕭軍書席下函仍閉

鐵騎城頭糜已調玉璽驟驚歸北國美人猶自說南朝  
賞心亭畔孤魂在寒雨淒風自寂寥

孫家兒子仲謀才大帝江東霸業開形勝一時推虎踞  
英雄半壁盡龍媒中原巨艦終成燼西蜀連營旋作灰  
但使後傳饒勝算樓船容易上游來

燈花

別將燈蕊去莫遣傍粧臺如何虛報喜不見阿歡來

蓮枕

新繡紅蓮枕雙花垂弱蒂刀環知幾時空擬並頭意

閨詠二首

春恨長于春晝長偷拚一枕嫁裴航可知幽夢多撩亂



墮却釵頭雙鳳凰

綠扇搖風病欲癯擬將一葉寄狂夫無情最是秋宵雨

曾到狂夫枕上無

方若坤

字七世嫡傳孫也桂林公璽書誥命奏議袍笏

號陸嶺季廉石洲公曾冢孫桂林公

藏松鶴樓公世守之丁丑寇至人曰可以去矣公日累世澹物俱藏斯樓舍之去先靈奚依脫有不諱亦惟效國君社稷之義及樓焚而公以身殉

與子偕老詩四首

昌黎刺鄂人吾曹誦周姊此義一何幽古來無明紀然

而慷慨捐其生猶勝束手視其死聖人不易吾言矣

男子自刎者杳杳女子自刎者皎皎女子仗節死義多

男子仗節死義少君不見粉黛乃男子鬚眉皆婦人胡

為乎周母不制禮隋主嘆不均

啟期自幸為男子而我自恨非丈夫關葺負此昂藏軀

寧不媿我周家姑

松石雖無子壺山尚有妻樂機三載割梁案百年齊九

死天難籲一生肝可披此之謂自慊非以博標題

題天筆山房

奇峰突兀小窻前靈氣都從造化傳雁字幾行雲際渡

長天萬里作霞箋

附

方若虹妻盛氏

氏本名家女適若虹嫻于婦道間以其暇攻吟咏里中女士爭延致

蘭闥佩其琚璜之訓不獨涉獵詞場也方子且易曾受業于若虹之門為予誦其詩如月一聲流碧落空皆鶴唳不成眠螢火亂飛星欲落波光一片月生塵惜不記其全皆可誦也



寄方姑

柳盪千村綠桃開滿院紅水流拋夜月山靜拂春風鳥宿枝忘倦雲飛天欲空故人百里外常在夢魂中

秋夜

別怨驚花夢離愁斷月魂砌荒垂松冷窗外泣黃昏

雨夜

一夜寒生萬樹風白雲飛出幾千重隱隱樓頭三陣雨

鷄鳴催動五更鐘

古意

此首且易記憶未真姑存之

滿斟碧酒汎菖蒲先醉婆婆後小姑婆醉有儂儂有壻小姑醉殺倩誰扶

方若素

字小白一字素心少夙慧日讀數千百言即終身不忘補邑諸生屢應京兆試不售長于

詩古文與同里姚士晉吳紹廉號龍眠三珠樹為金石交

題周壺山姑丈與子偕老詩

周君舊號壺山矣我亦謬稱壺山子我有大姑能事君侍御椽筆旌以文家諸父魯岳翁有序諸君有詩詩幾首我亦狂歌續其後西臺入對者何時首採斯文爰及詩

讀桂林公詩

公詩藏松鶴樓百三十餘年矣天啓五年仲冬朔日不肖若素始發而抄之將梓焉手彙還之樓上勗宗子若坤世守之

告老歸來尚黑頭田間十有二春秋暫登五馬驄先脫



纔落雙鵬弓已收星野每騰中夜氣天章尚在舊時樓  
于今無以繩其武他日胡然貽厥謀

讀孝廉去病公詩

公手橐甚富諸孫各守其一丙寅臘日不肖若  
素乞而抄之起戊子迄丙辰三十一年間無一  
字亾逸紀之以詩

落落孝廉三十載天官汲汲不能官干旌罔識澹臺面

袍烏空傳范叔寒松鶴韻中多遠調梅花氣外有餘酸

三千禮樂承光寵依舊邯鄲夢未殘

三千禮樂承光寵五百英豪佐聖朝

公夢中句也

至靜山詩 有序

至靜者若素從弟曠世逸才也初事著述生來  
頗多靈異暑夜有從帷外揮扇者窻月微茫見  
之曉行有兩人翼衛道上兒童駭然也其未生  
也北堂夢金甲神送梁太子為之子無何至靜  
生將逝之前至靜又夢金甲神五輩以鼓吹幢  
旛迎至靜與之抗禮坐五將軍之上訂以行期  
云其捐尊人之養也尊人思之不置捐山十畝  
為漏澤園成至靜未竟之志山麓擬為庵以祀  
太子統仍以至靜之字字其山庶幾山在則至  
靜在乎至靜之前身在則太子之後身在乎其  
尊人吾從叔別號龍眠



勒石嶷然至靜山蕭梁太子有芳顏皖公不是尋常鎮  
楊子寧知第幾關一去六朝文物戒重來廿載唱酬慳  
此中公案誰能勘前後身原不等閒

從來至靜者惟山舍却山尋至靜艱天半雨風君怒態  
路旁卉草爾懽顏琅函大展山千疊鐵硯平磨水一灣  
南國重來根器別前身火熱後身閒

後身端的勝前身拚却千年種宿因地主人王經歷遍  
宰官居士往來頻雨餘徑滑團蕉遠風際烟疎香火新  
大抵四時皆一氣鳴蜩非夏鳥非春

楊樹灣

月影疎疎風力和玉簫遙和女郎歌西灣一路看楊柳

况是東灣楊柳多

斷碑

一代聲名如斗山斷碑千載在人間雖然添改無多字  
已落名家第二班

與姚休那論詩

萬戶通侯刻印刑十年不敢拜公安如何七尺昂藏骨  
老大隨人學瘦寒

從父舒江招同柱峰龍眠景濂中渡諸父及陟嶺

岱輿兩弟賞牡丹兼訂岱輿芍藥之約二首

怡情堂下牡丹花富貴于今第幾家但得諸君俱善酒  
一年一度不爲賒



牡丹花下不須詩縱使無詩花自奇堪羨竹林情興勃  
東隣芍藥拚千枝

汪百谷 字克下一字上善與同里方素心友善

送方素心

送送不成吟風光慘客心貂裘分雨濕潭水斷腸深茅  
店荒山繞楓林晚霧沉天涯從此別魂夢好相尋

秋日飲方素心

白雪才名爾大方蓬蒿仲蔚意飛揚論交豈獨盟車笠  
作賦還應貫驢驢蘿月一丘浮枕簟松風千樹灑衣裳  
茲宵一話成今古明日相思託雁行

趙連城 字聖生一字十五績學攻文尤尚行誼每歲首元旦立一簿逐月日登記所為以攷功過

數奇屢別不及中壽

贈隱者

千山圍一屋滿目白雲飛自食惟憑力恒年不苦饑萍  
鋪新水面苔結古墻衣莫下悲秋淚霜林已賜緋

別友人

尔我論交久知心夙有年韻分明月下酒對綠楊前麥  
湧田田浪榆飄樹樹錢春風催判袂欲別已潸然

方叔猷 字克壯邑諸生明經月恒公之冢子予之婦翁也少豪放能遠自恣獨與姚休那先生善

嘗目予謂姚先生曰此子異時必能任重致遠姚先生嘗為予勗之晚乃游于酒人酒酣議論風發目無坐客比歿姚先生為詩哭之曰對酒風生方克壯此行如以酒還真祗因不是中山酒近日醒時憶故人即公之襟期可見矣所著詩予猶及見其全集惜天奪之年及三十六而卒內弟甫髫齡



遺稿散落厓于姚先生所輯  
友人詩帙中得其片鸞云  
只笑漁翁語  
不與中山  
題石大士

題石大士

一切都非夢石真佛亦真有形難作果無相豈成因半  
夜法王話千年童子身區區說石者何至又何賓

不與前交入眼必成  
不與前交入眼必成  
不與前交入眼必成

漁父八

漁父八  
漁父八  
漁父八

于山田一  
于山田一  
于山田一

龍眠風雅卷二十八目錄

木厓潘 江蜀藻輯

錫山王仁灝時大

同里方中發有懷

方 鯤 七首

趙士先 十六首

光時亨 三十首

高日光 一首

何應珽 一首

都克任 二首

何棟 四首

白 瑜 八首

夏統春 十三首

張秉燁 三首

王夷吾 一首

葉士瑛 三首

白 筠 三首

白 篆 一首



胡如瓏 二首

龍眠風雅卷二十八

木厓潘 江蜀藻輯

白

瑜

字取仲崇禎間歲貢生好學有識量博聞強識品行矜然初舉賢良不就繼以廷對稱旨欲大用之為執政所擠僅授雲南府推官值艱不果行服闋補登州甲申之變棄官歸里隱居大龍山絕意仕進方貞述公為作七棠先生序亦五柳之遺意也卒年六十學者謚曰靖識先生

浮海南還

魯連蹈東海田疇入無終節義各有適英名千載同志  
士豈為名心如白日中炤徹黑水底餘光散成虹憂來  
不可寫怒濤自生風風濤有時息此恨長何窮

哭汪皖公二首

詩酒交誠快與君俱偶然醉醒期自適工拙豈須傳世



法已都棄此心真可憐暮年割愛子腸斷亦呼天

老友云已沒誰念我馳驅化鶴終當返騎鯨應共呼公卒

於蕪陰近采石至情兄弟外白首海天隅後死知何託魂來一

慰吾時予將之官登州

漫興

莫逐群芳怨歲寒秋風原自惜齊統孝經一部隨立晏  
白布单衣老幼安交到暮年無可絕酒雖獨坐亦成歡  
閒閒十畝龍山下不向清風賦考槃

送方仁植撫楚

於今元老推方叔仗鉞來威及壯年雲夢已知吞八九  
鯤鵬何但擊三千雄風坐嘯揮長劍明月中流敞別筵

蚤晚即傳穢賊報大龍野老抱書眠

五旬偕門人農父爾止密之江口客度

苦思少壯亦何為老去龍山舊布衣潮落海門搖客夢  
雲開霜樹弄晴暉百年如寄已過半十月嚴寒尚未歸  
博得諸生稱祭酒且將末契暫相依

喜密之成進士

總角城東稽古堂高冠長劍自稱狂凌雲當日惟司馬  
流涕今時又洛陽海內讀書知有種山中函丈亦生光  
夔龍寶篆曾占夢佇聽賡歌爾拜揚

長至平原道中東李繩抑年丈

漫喜陽回一線新天南海北正愁人饑鳥蹲樹水為粒



胡馬嘶風雪作塵六瑄有心迎暖候三江何日問歸津  
已知官舍寒如我好共煨爐說隱淪

方

鯤字夢名號羽南少為名諸生長而博極經史尤精易學得葉兼山先生先天圖學之秘傳

推河洛縱橫之圖以測古人制樂用兵之法往往膠合既乃取繫辭八卦相盪程子加一倍之說衍為卦義撰易盪一書黃宮詹石齋何侍郎立子見而激賞之以為得未曾有姚子經三為梓以行世先生與姚樞部戊生為髻毘交諸子皆執經門下自號石門易隱卒年八十學者私謚為文潛先生所著有其所著有其旋堂詩集

孫烈卿招飲賞月

秋風吹我衣秋容忽已老况值授衣時歸與胡不早物  
態令人悲愁緒為君掃竹葉清如泉菊花開正好招我  
醉明月夜永還傾倒

夏日同趙五城遊石牛古洞

泉聲響絕澗山谷何清幽古木鬱蒼翠好友相綢繆洞  
深迷曲徑溪環遶石牛黃公昔流連蘇子繼遨遊勝跡  
杳難攀孤韻獨長留興來偶一往月出若相謀披襟夜  
生涼對酒心何憂梵音下林際塔影蕩波流萬籟忽已  
寂曠懷無所求歸歟聊可咏來往任悠悠

山寺感懷

疎林雨過氣清絕科頭坐聽泉嗚咽倦來新汲谷泉香  
煮茗啜之望晴雪男兒生不逢明時莫向侯門覓相知  
侯門冠蓋紛相逐往來何人不朱轂七尺骯髒氣吐虹  
且學山中老涪翁古洞清泉流不盡長歌樂亦在其中



晚權

風急晚催權，濤起狎鷗岸。陰連雨合山，色帶烟收鳥。  
語前村靜鐘鳴，野寺幽如何歸欲速，燈火照前舟。

旅寓感懷

杏花開欲遍，散步怯春寒。沽酒偏難醉，攤書不耐看。  
家貧勞客夢，老健覺心安。擾擾人間世，何妨訪大丹。

夏日飲榮園

主人臺榭俯漣漪，夾道層陰暑更宜。怪石穿雲峰斷續，  
蒼松蟠谷影參差。荷舒綠翠迷苔徑，花吐清香到酒卮。  
飲罷欲歸猶未去，開窓趺坐聽黃鸝。

雪僧

禪定何須更掩扉，臨風却自耐寒威。珠宮湧現頭陀相，  
瑤室光浮釋子衣。纔覺散花身業淨，旋疑杖錫月中歸。  
白雲片片嘗相護，彈指雙林柳絮飛。

夏統春

字元夫，宜黃令。惺寰公第三子，生而岸異，年十三補博士弟子。七試秋闈，不見收。崇禎間舉賢良，授湖廣黃陂縣丞。居官廉能有聲，直指汪公特薦補麻陽令。未赴任，賊陷陂，執之，聞其素得民心，餌以偽守，公怒叱之曰：「吾家世清白，官雖小，臣子也，肯從死賊反乎？」賊怒殺之。事聞下所司議，贈卹，會闖逆陷京師，未果。生平好讀書，為人慷慨，重名節，所著詩有碎玉集行世。

夜半過壩

河流據高原，水為堤所障。不有以防之，其勢易奔放。  
客舟泊其旁，中虛乃得上。篙櫓無所施，桔槔轉相向。  
幸我束裝輕，行李無兼兩。登岸夜何其，村鷄猶未唱。  
衣犯五



更霜客抱空惆悵  
晚雲飛不盡孤鳥去偏遲  
樹密留人處山昏欲雨時  
漁歌歸別浦松火隔疎籬  
刈得前畦麥朝來飯可炊

西山

花殘春欲暮莫負郭西山  
野霽連朝雨人乘半日閒  
樽開青嶂逼鳥拂翠屏還  
留得謝公屐年年共爾攀

春雪懷謝中隱

雪滿荒城山可知凍雲封處樹披離  
堦涵素影搖虛幌  
峰歛寒容逼短籬  
比舍翁邀春酒罷隔溪僧至午炊遲  
憶君清况應如此不學袁安臥不移

建德道中

風散空濛宿雨絲  
客程今日不爲疲  
寒驢耳峻溪橋窄  
僮僕肩欹石磴危  
松逕陰濃行恐盡  
酒帘搖颺到偏遲  
老于詩律吟殊苦  
撚斷霜髯尚未知

早泊

欲霜不霜天氣昏  
作客憎客旅思繁  
路險泊舟未及暮  
囊空貰酒難盈尊  
一林楓葉紅將墜  
兩岸草虫寂不喧  
薄寒中人殊可畏  
何日翩然歸里門

初秋喜姚振先見訪

蔣生三逕屬初平  
惠我良朋倒屣迎  
曉起藤花鋪石砌  
夜來山雨過柴荆  
敢言俗駕無停轍  
轉覺荒居不在城



尊酒何妨時一醉蕭蕭梧竹又秋聲  
春盡偶閒平惠甚其眼困與豈執或燕亦能不

但得居閒不厭貧晝長軒靜款殘春  
落花輕颺常過院乳燕低飛不避人  
寧獨善忘書懶讀亦緣貪臥枕常親  
年來薄獲無餘秣對影多慚漉酒中

渡口阻雨

渡口風狂雨驟飛且投山店坐燎衣  
欲寬寒夜羈愁劇莫厭荒村酒力微  
灘會衆流聲入市雲蒸千嶂濕侵扉  
如膏春雨雖堪羨無奈前途客去稀

九江晚泊

斜風一葉入江村臨水人家早閉門  
翠鳥浴隨輕浪去白魚取起小舟喧  
鑪烟漠漠連天際溢草萋萋過雨痕  
最苦夜深鐘定後短篷殘火向誰論

道士湫

漁歌隔浦晚猶聞烟景迷離向夕  
暝樹直鳥棲峰頂月溪清魚戲水中  
雲幸無風鶴眠何穩賴有霜螯飲漸  
醺蘭漿又倦天曉發江花渚鴈各紛紛

月湖晚泊

瘦筇輕屐暫徘徊  
洞宕漾湖光樹色開  
細草潛生疎雨過  
危橋欲斷驟潮來  
爭巢燕子迎風舞  
緩櫓漁人落日迴  
寂寂芳洲春漸晚  
青帘動處有香醅

落葉



半欲辭條半已垂紛紛無奈晚風吹非關萸莢陰偏改  
不獨梧桐信早知山客掃來旋煮茗佳人拾得可題詩  
分明濃綠深深見珍重明年二月時

趙士先

字元振萬曆間諸生性至孝鍵戶淵修研究性理慨然以父祖相傳之學自任追述先集

有永思錄晚研堂稿孝思纏綿鬱勃行間尋入太學高尚不仕號辰石山樵所著有篋園蝶菴諸集

邑人私謚貞靜先生

蓮花憶 有序

無蓮而憶有蓮之時其情傷情傷而不容默也  
于是乎詩嗟乎西園而有勺池也勺池而有蓮  
也既多歷年所矣復于龍眠再築玉淑使遠近  
一色薛君孟常為繪玉淑圖而以二美人居之

今事往景虛恍如昔夢賦曼聲烏烏其能已乎

至人為園貯傾國百花深處驕顏色覓得菱荷種滿池  
年年歲歲稱相識凌波照影一勺幽左顧右盼兩悠悠  
明月飄飄香入夜涼風披拂艷臨秋壺觴四座歌聲度  
宴賞渾忘新與故枝低葉密巧扶持渺渺無言薌澤慕  
更向龍眠開野塘玉淑方廣儼中央群峰峯嶽皆爭勝  
一水渟泓暗襲香畫圖尺幅鋪生絹茵蔕影現光涵練  
低徊流連聚如雲繞堤緩步窺花面本無情處最多情  
漫道看他百媚迎惟知樂在隨緣是未審愁從何處生  
描取宮鬟雙美女笑對荷花嬌欲語茗椀爐香几上供  
並蒂同心訂幾許物換星流幾度移伊人宛在伴芳枝



勺池已廢玉淑竭兩地花開未有期空懷往事增懊惱  
病骨支離對荒草藕絲欲續倩誰聯紅顏委謝青娥老  
滄桑變易等浮塵何須苦憶畫中人蟪蛄世界都成夢  
九品蓮花佛座親  
一 庚午放後述懷  
射策緣何薄追思淚不禁易消三載日難遣一時心南  
國空探勝西窓仍惜陰歸舟從鈍滯羞返舊山林  
襄兒八歲初度又漢姪賦詩見贈酬之  
童年看漸長佛日照無私  
初度爲浴佛日何意彩毫彥還將黃  
絹遺詩書須早授堂構可重期舊德于門遠吾宗望白  
眉

集西郭園亭

西郭偶乘興園亭坐竹圍樹梢黃鳥語峰頂白雲飛桐  
葉枝枝密蓮花瓣瓣稀壺觴行處樂須待夕陽歸

除夕又雪  
時在圍城中

又雪晴難必寒窓更覺寒重飄書卷濕倍促酒杯乾命  
定愁何益身閒意儘寬夜深無爆竹只聽柝聲殘

白門對月有感

仍是西樓月寒宵淮水邊有情將孰遣無夢向他圓風  
冷簫聲徹更深樹影偏病懷憐久鬱踴躍梵王前

臥病

臥起心情懶晴窓耐索居春光忽已暮人事總成虛凭



几聊題句拈毫懶著書文園方病渴誰復念相如

浮山禮本師朗日和尚塔因懷先徵君

骨山秋晚現優曇當日維摩幾度叅曾向林巒窮六六

更從雲水辨三三金身殿裏圓珠額丈六像先君施珠貝葉書

中法寶函賜藏先君襄事贈證自慚龍是種朗師有自是龍種語欲尋殘

局禮香龕

自秣陵歸抵家藉花齋尚爲人所據感賦

只說羈棲不若歸豈知歸日尚無依家鄉乍到猶如客

舟楫雖離未啓扉亂後一枝誰復有貧來百事總成非

翻思白下居停處愁看庭鳥繞樹飛

次韻答又漢姪金斗見懷之作

寂寞衰宗落魄同竹林兩地悵途窮青氈夜半慚王敬

甲戌民亂予遭賊掠絳帳春深憶馬融又漢投經金斗新寄瑤篇真大雅

遠貽紈扇是仁風更兼松雪工書法不信君才老桂叢

前湖看菊

採菊沿籬傍水涯澄湖秋晚老蒹葭節過九日登云暮

人尚他鄉感倍加但得有山皆著屐豈因無酒不看花

扶筇到處添幽賞且賦新詩紀歲華

下第有感二首

老我風塵半百年名場潦倒興蕭然况經世亂家無定

只合蒲團了淨緣

秋闈五度泣長干別足徒嗟行路難自是衰宗門祚薄



無人博得桂花看

又漢與襄兒俱被放

只合觀助兒瓶梅

老我支離又見春花前又喜一年新吾兒解取瓶中趣  
猶有梅花識主人

秋山如畫映秋光

空憶龍眠舊草堂十載未尋巖壑勝

芙蓉仍發在橫塘

初度

浮生又是一年期白髮鬢髮滿鬢絲幸有庭前雙玉樹

臘梅香處酒盈卮

張秉葵

字孩之號拙菴崇禎未考授別駕少事三親  
婉容愉色訓子弟以淳謹勿營分外之求蓋

入

大叅公之家教然也崇禎十五年歲饑為糜于衢  
所賑活甚眾鄉里德之以子英貴封翰林院庶吉

天

士年七十有五生平不多作詩其子杰口授  
三首黃鐘大呂古音颯颯猶見大雅之遺也

歸田述志

我性本恬靜輒為外物牽誤落塵網中荏苒五十年形

氣因以憊夢魂亦不全思欲脫纏縛謝此塵區緣選僕

得壯健乘春耕瘠田買山供樵採誅茅葺舊椽葵藿蔭

後園桑柘羅堂前同心三兩人日夕相周旋禮法既不

設臺緇復不鮮讀書任意解彈碁隨手捐穉子拾橡栗

山妻治粥饘策杖憩危石啜茗煮流泉洗心皈靜業長

嘯揖金仙焚香待明月孤村起暮烟寤歌動林木幽興

許誰傳



音韻通雅卷二十八  
同友人過五印寺舊址喜槐公卓錫初至

荒蕪南郭地昔日有高臺借問興者誰香刹朗公開紫  
衣頰闕下白馬帶經來書棟凌霄漢金像迴塵埃劫火  
一朝起崔嵬安在哉村墟殘夕照塔影落青苔斯道豈  
淪滅禪師得古槐妙契人天旨夙本龍象胎誅茅按故  
址葺屋構新材雲霞生戶牖蒼翠藹庭階潤蒙茸作雨  
振噴吼如雷至誠能動物群趨破蒿萊皈依常恐後陶  
鑄愧非才

讀春陵行有感作苦桐吟

天高未云高聽我苦桐吟甲戌亂民起乙亥賊騎橫殺  
人如刈草百里不聞聲四郊盡焚掠歸然峙孤城連綿  
十五載無歲不稱兵少壯離鄉國老弱填溝塍青燐徧  
原野白骨積嶙峋死者既不甦生者更惛惛異地不我  
顧愀然懷舊村歸來望城郭涕淚滿衣巾相逢皆鵠面  
話久始知名親朋寧有幾十室九伶仃野葛蔓露井落  
日照山墳資生乏長策努力事躬耕青苗未覘土符牒  
躡我門官司教頻下三稅一時并豪吏猛如虎鷄犬那  
得有鬻婦免榜笞含悽未忍云得錢不到手餅壘依然  
傾富人糶新穀穀賤賈人輕銀鉛互雜沓還將活火烹  
烹來減其半捫胷自酸辛猶慮生嗔怒斂錢丐要津嗟  
彼中澤鴻嗷嗷向誰陳豈無歡樂家笑獨非其人欲言  
不盡意請讀春陵行



光時亨

字羽聖號含萬崇禎甲戌進士知四川榮昌縣以卓異考選賜對左掖門畧言近事之謬

莫如撫賊

又言諸將野戰不講陳法條對幾萬言上為起立佇視除刑科給事中疏陳忠鯁多所

匡救會詞

臣李明睿議請親征為南遷地公特疏叅之時上已涕明睿議矣京師陷墮俾不得死

僅折臂又覓死

不得南歸馬士英等以阻南遷殺之所著有素堂集憂患集

齊山孤眺

齊山孤眺

山齊石不齊齊名何自始字斷千年垂烟寒四時起奇

不在崖面幽寧爭谷裡登陟吐光靈夕照入城市携琴

聽湖風來往吹未已

西湖懷古

湖光何靜漾山色與透邈四時但一氣日月空烟裡迨

閱無銓次細窮領終始翛然身若夢遂令魂魄止東南

靈輿區天地殫其美俯仰百千年咄嗟僅彈指古人歌

舞處滅沒成荆杞不見吳山峰遙隔閭門水

丁丑寇警徵鄉勇守蜀榮昌城

中原多戰伐披猖及孤城虎豹有瓜牙所以威其聲下

令集丘甲荷戈皆我兵賊情變風雨勿畏雷霆轟死賊

無死法審處敢不明清內防伏莽禦外詳遠偵更番休

爾力織悉揣微情守堞如一體節節務相生我亦有子

弟與爾稱弟兄不用誇三略惟祈堅一誠至誠物所服

山岳亦為平定志安膽魄夢寐毋自驚

南樓誓眾

人臣既委質食祿當不苟受事令一方此身豈我有即



龍耳居卷二十八  
遇管葛儔尚須爭勝負矧今逢小敵安能遽却走仰視  
頭上天俯視腰間綬我心如恇怯有劔甘在首讀書懷  
古人夙昔恥人後睢陽與常山不成亦匪咎瀝血矢神  
明彈劔作鳴吼不用三遣子廷瑞赴郡請兵

疇不喜言兵譚虎輒變色賊衆數萬來聞者空嘆息我  
爲天子臣焉敢溺厥職安岳業報陷揣勢亦孔亟汝年  
甫十六何忍離父側人生達義命少小鍊膽識我心捍  
封疆汝亦志家國小恩可不全何用空悲盡速出効包  
胥忍辱甘匍匐師來勿遲遲往返七日得我暫張疑兵  
賊至莫我測日昨發虛符聞賊少挫抑浮雲蔽西隅陰  
房風雨黑丈夫存鬚眉豈徒懷嘿塞愧我非智勇猶能  
無懼惑汝行勿弗疑所期往必克

庚辰冬再值寇警誓衆

去年戰城南馘血尚未乾今年再寇郊從容理征鞍登  
埤矢萬衆繁憂集千端妻孥出視師奴僕環執干閉門  
令束伍司馬法難寬擊鼓起暮氣鳴鉦催漏殘城外流  
水急城頭風日寒月色照霜甲爲我壯胆肝我民未半  
飽忍辭粗糲餐我民弗寧處忍畏衾稠單不自親鋒鏑  
安知戰守難願言圖剪滅長驅築京觀我亦爾軀命勿  
復徒心酸

揚兵却敵



昨聞下新邑今聞陷瀘陽虎賁十萬衆何事空戎行艱  
難集田衆慷慨諭多方城郭衛爾身困廩裕爾糧縣官  
爲爾帥七尺亦相當所難剖示爾區區此肺腸萬衆環  
戟立屬耳領端詳張眉指白日噴血瀝秋霜開門出巾  
幘使我兵氣揚人生勿憚死馬革庸何傷結陣郊鵝鶴  
揚旌擬順昌忽爾賊遠遁爲衆數舉觴田衆告成功各  
歸事稻梁

泣黃湓

天地亦云廣一區空爾存江北未返骨江南孰招魂羈  
棲不得歸日夕悲恨吞僅餘數莖髮未忍全爲髡留身  
將有爲反負怙恃恩干戈塞道路况鮮第與曷荒丘生

淒涼蒿萊蔽孤墩夜夜如寒食燈火不復溫感此溪頭  
月分輝炤樵門遙爲禮河伯鼃鼃莫亂翻遙爲叩山靈  
猿猱莫頻喧恐驚雙親夢益痛遊子寃遊子寃莫雪有  
寃那敢言涕嗟忠孝事千秋將何論安得死親傍永守  
枯樹根

寄內

結髮三十年別離恒十五昔日別離難今日別離苦感  
子明月心炤我同終古不怨比翼分匪嗟北門窶我生  
寒義命王事徒靡盬門祚多衰薄那得封萬戶恨不從  
於陵偕子學種圃南園日以荒春蔬不可取蔓草彌空  
山孤蒿誰與撫二三僮僕散群兒靡安堵嗟此七尺軀



莫歷九州土朝驚飛鳥度夕畏室鼠侮耿耿埋青鏡兩  
地浮雲睹不敢尋歸夢路恐逢豺虎閉閣斂樵烟前簷  
墜微雨玉車訖氣盈門軌空寒漸振新泥試問不  
下地示諸子好同林肯不於此與心對與此門說  
方我讀書初慷慨輕七略不傍李膺門寧慕公孫閣其  
如時數違有懷多舛錯昔人重知幾何事競謬謬匪同  
機與雲寧嗟華亭鶴惟念立身難今也更非昨群兒負  
氣誼所勗在靜約不見數尺羅能下層霄鵲祖父耕桑  
業自我成零落獨有架上篇終古聚英魄嘗存貧賤懷  
富貴毋鄙薄嘗凜患難想居恒無耽樂嘗念衣食艱出  
入毋浪作嘗畏人情險寸心毋漫託海內亂未平聚散

如隕籜勿言善可恃汝父亦不惡念之愴然悲此身何  
飄泊所以古之人不非黃老學

懷姊

姊年今六十屈指設悅辰有弟不能晤逃遠慚情親豈  
曰骨肉疎奈此羈縻身嗟我作廉吏令姊長食貧嗟我  
構禍亂令姊倍傷神吾甥寄書來道姊意諄諄姊猶欣  
我在旦夕解眉顰豈知寄來書如語泉下人憶昔一日  
者爲我說來因長大必壽考王家爲賓臣父母喜動顏  
姊亦愛如珍而今回首思星緯總不真家園五百里隔  
在河漢津陰雲夕夕秋岩桃空自春欲回吾甥緘恐姊  
增酸辛吁嗟同蒂花飄零成梗萍



音賦風雅卷二十八  
三月廿日被執密作此詩寄授兒輩

東海之水何湯湯我欲蹈之遠難翔西山之薇不可食  
我欲採之空太息自古聖哲良可師此身不死將奚爲  
吾君吾親恩莫報誰家誰國忍相隨侍中血常山舌寄  
書友人先與訣議無補恨轉深題詩血淚在衣襟城頭  
城下與城中一望荒烟吹悲風吾志已決畢義命擬承  
浩氣歸太空

十月關獨坐

園小得匡坐無人覺自幽護花多購石碍竹欲移樓榻  
靜常隨月詩寒可敵秋蒼苔深徑裡落葉至今留

秋夜聞琴

廣陵誰謂絕餘調滿江城落葉一何靜月明如有聲動  
操群鳥下觸手孤雲生我亦移情者長歌滄海清

別楊錦仙父母之蜀

未陟蠶叢路逢君話遠人片帆江上夜三峽夢中身薄  
宦皆如水殊鄉憶比隣海棠香倘在遙贈故園春

皖江競渡弔靈均

騷魂憑不盡角黍禮潺湲是水皆湘水何山不楚山江  
空歌棹疾風靜芰荷閒嘆息千秋內深波落月殷

西山碧雲寺留宿萬公房

秋山如靜友攝坐自清心向壁領泉氣隔林聞鳥音竹  
樓棲影暗松徑落陰深咫尺帝城近登高星漢臨



署中偶成

寸心罕所適荒署間鳴絃選筆刪花譜安床縱鶴眠吏  
愚閒案牘官拙少周旋欲學陶元亮踟躕乏稊田

秋夜同方五雲在虞胡子寧吳陶義飲士新勺園  
散髮步西原雲平澗不喧壑泉秋自落山翠夜忘言坐  
適情逾適談深道自尊枯藤隨手折帶月掩柴門

將之昌元別史館諸年丈

尋常較古未能寬纔得登車事已難同籍幾時身北面  
一官萬里路西盤玉墀香篆披雲近劍閣芙蓉徹夜寒  
此去眉山視仙草遙知蓮炬滿長安

入蜀

三巴文教阻荒遐此日飛流溯遠槎筇竹杖頭秋色老  
杜鵬峽裡月光斜因多疑字思玄草爲洗詩腸到浣花  
安得輸種無訟芋海棠香滿萬人家

因籌兵過妙高寺謁馮少師化身

石自爲供花自茵鳥聲啼亂夕陽春尋常紀夢多疑事  
今日叅山識幻身香氣滿林烹白水虛堂一榻倚蒼筠  
青龜古柏年如此何必桃源學避秦

醉後預懷瀑松巖幸與麻交舊亦云

眼前巖壑曠多期矧復孤踪任所之七載塵勞空有骨  
一腔血熱自憐癡赤松黃石知誰是白馬青牛幻我思  
安得烟雲收剪尺常將瀑布濯鬚眉



淮獄

瓦縫參差蝠鼠飛  
枕邊箕斗欲浮衣  
百年國事恩仇壞  
半世癡腸慷慨非  
鴻雁畏人書不至  
于戈入夢願多違  
相逢問姓無相識  
幸值窮交舊布衣

贈休上人

亂光圍屋暗香穿  
幾遣詩魂寄竹邊  
予有此心難贈子  
佛教如是好參禪  
斷岩餘翠飛殘炤  
小野新春碎石烟  
所事茫茫誰足信  
草堂獨宿意飄然

山居雜咏

山下藤暉剛滿樓  
兼聽壑水走篁篸  
烟迷蕙谷遊仙夢  
風亂香汀送客秋  
暝寺霜鐘容鶴管  
清林竹月引花搜

詩盟酒賦酣如此  
携手重尋洞口舟

山居雜咏二首

高齋有餘閒  
牙軸滿床積  
焚香憶古人  
讀書深幾尺  
鑿池通山泉  
流水何朝暮  
因風蘋藻開  
中見明月路

食蓮

採秋須採香  
食蓮須食心  
食心勿云苦  
幽香正耐尋

素堂紀懷

戶外蒼涼積翠通  
饑餐明月立宵中  
文章別有青山價  
却訝昌黎說送窮

王夷吾

字爾須崇禎  
間諸生家子  
西郊之官莊  
橋好古篤學以  
教授生徒為  
業予兄弟皆  
出其門性豪  
放負氣慷慨  
高自位置詩  
文皆有名于  
時當其命觴  
染翰雖斗酒  
百篇不足多  
也予初學為  
詩



先生實獎借之今追憶少時諷誦其詩有如噩夢  
僅記贈先府君詩一首每過官莊橋訪問其宗人  
不可得為腹痛歎歎者久之崇禎丁丑以賊其門  
殺其母與賊鬪遇害事詳郡邑乘中不備載

賊退後潘九莖過訪賦贈

玉賓離亂孟春餘偶爾伴來却夏初我已山中辭客舍  
君仍湖上借人居清晨楊柳鳴乾鵲向午門庭繫寒驢  
沽酒淹留須盡醉黃墟且喜未丘墟

高日光

字合其  
邑諸生

山居

避俗貪高臥深居愛掩關逢人惟命酒無事祇看山月  
小疎林淡風輕野水閒夜來常夢雨處處響潺湲

柴士瑛

字潛之號瀛洲崇禎甲戌進士大宗伯曾城  
公之少子也孺染家學詩文皆有根柢同儕

遇學行可師者擇而後交匪是則終歲罕見其面  
侃侃如也以恩選遊北雍舉于南宮觀政未及朞  
而卒公出曹峩雪太史之門沉博絕麗不愧臺閣  
而未究其用士論惜之生平愛清絮方袍幅巾匡  
坐一室無跛倚陝輪之容登其庭者比之郭林宗  
米海嶽所作詩力摹初盛不襲郊島惜少有傳者

西山別業

結廬在空谷非敢希園綺愛茲山水佳且未遠鄉里歲  
時定省暇囊書即來此編籬借荆榛拓徑除棘枳簷楹  
有餘清空翠到窓紙幽堪鼓素琴靜復親圖史面几即  
青峰繞砌聽流水恍見貞白心如洗巢由耳孤雀司戶  
庭長鬚足炊醜溪鮮既芳潔山蔬亦甘美披衣入翠微  
置身圖畫裏無計慰老親一躡春明履愧乏賈董言猥  
蒙至尊齒衆人志飽温予意薄金柴歸來啓柴扉重見



音耶屋牙卷三  
舊知已綠葉長濃陰丹葩發新蕊銜杯手一卷私心竊  
自喜輯我未完書事業母乃是丈夫重功名謀終盡慎  
始

舒城道中

山行朝雨後一路翠微天烽火纔過眼桑麻喜在田人  
家春柳外鳥語落花邊了却邯鄲夢投閒問輞川

都門留別劉湛六殿元諸同年

金門柳色動驪歌早有西山爽氣過自飫君羹鱸思切  
喜聯仙響鳳毛多風烟不斷黃花戍雲日常懷太液波

欲向龍眠尋舊業鷄聲還與聽鳴珂

何應璉

字搢之方伯虛白公第三子少善文與兄應璉同食餼于郡庠讀書至丙夜不懈久次諸

生以年資例得貢禮部會疾作未及行而歿

暮雨

簷溜翻盆夜有聲案頭燈火倍分明雨來汗漫窓前暗  
詩費敲推枕上成抱膝自憐寒到骨掩門終日靜無情  
時危祇合茅齋坐不向人間浪得名

白筠

字子皮號逸岑靖識先生之子也天啓間諸生少有雋才覃心經術甲申後棄舉子業遊

遊四方嘗之司空訪李漑林先生方子竹西贈之詩云君到山城我日歸可憐明月各清暉十年老友廿年別一處征鴻兩處飛翻覆乾坤嘉會邈飄零湖海壯心違皆因有母求微養不惜塵沙染客衣其風期可想見也竹西又言子皮耆學篝燈宿振病盲者三載遇異人授方藥復有城南之遊孝事孀母曾負米為母備後兵而身先歿可哀也已

楚中初度憶老母七旬將近尅期歸



年華何太速客裏四逢生不使主人覺愈增遊子情焚  
香遙拜母計日好飛觥明發扁舟去江風瑟瑟聲

雪後早發

乘凍貪朝發水堅喘履穿酒無一舍力春有半江烟母  
老惟求粟才微願執鞭年年携襪被不待曉晴天

高座寺同無可師咏梅下僧

鶴夢何須到雪堂珊珊還整舊霓裳渾疑衛叔風前立  
更訝荀郎座有香薄命紅顏曾並蒂多情白髮也生光  
棲鴉正好南枝穩不負樓頭一夜霜

都克任

字子肩邑諸生青田令諱昌之曾孫年三十  
食餼于庠常註易詩書三經又善秦漢篆刻

七夕

佳夕常年引興遙如何此夜轉無聊不知有鵲填空濶  
但見流螢照寂寥月落遠村人語靜涼生小院晚香飄  
步檐幾度呼童子指點明星看斗杓

同友人納涼文昌閣

高閣層欄俯碧霄解衣施簟坐逍遙人來不覺涼隨至  
話久都令暑漸消何處清霜飛六月時有所感多年好瓦覆  
前朝耽閒莫問興亾事只當逢僧憩竹寮

白

篆

字子穀邑諸生  
子皮之兄也

客中聞布穀

忽聽布穀動春聲喚起征途客子情  
驢背西馳六十日身慈南隔二千程  
少年悔不遨遊徧亂世休教然諾輕



我欲捲書還故國龍山從此耐躬耕

何棟

原名永棟字克上號退齋銓部尚書公之子也天啓間諸生試輒領軍才名蔚起善臨池

得晉人筆意性豪俠揮千金如涕唾晚以吟咏自適與二三老宿賡酬無虛日有蓮溪詩稿年七十

終餘

獨酌

小窻懸翠靄簷際落晴雲密蕊蜂穿樹香泥燕啄芹焙

茶秋露碧曬藥夕陽曛獨酌無兼味葵蔬入口芬

訪山僧不遇

寒山無客到破寺有僧存數折入松徑一籬開竹門

牛閒曠野饑雀噪荒村託鉢空應返霜天煮蕨根

從弟三江集飲

竹裏寒香臥老梅移尊花下恰初開黃柑摘取留青葉

緇侶追隨破綠苔茗椀趣從魚梵得詩筒與自酒杯來

殘冬倘發山陰權為掃柴關雪夜陪

懷從弟方屏

池塘草色戀斜暉鴻雁驚秋陣陣飛夾岸漸愁荷葉破

隔溪猶喜藥苗肥燈青墨榻詩瓢滿露白苔痕展齒稀

風雨情牽如過問銜杯待月夜深歸

胡如瓏

字木夫崇禎中諸生與兄子克即公皆負才名而木夫性尤溫雅有汪汪千頃之度士林

以大成期之年三十餘早卒

懷陳二如

都人臺笠曳瓊琚獨枝蒲編閉石渠一去弟兄同海運



龍耳風牙卷二十八  
幾回烽火問鄉書  
迎軒花氣香無價  
戲馬芳郊興有餘  
早達長門買詞賦  
千金寧不富相如

送家卽公之淮安

子叅幕府赴淮陰  
百計難牽頃刻心  
萱草春秋歷霜雪  
棠華南北自蕭森  
庭空似水愁無賴  
命在如絲老更侵  
好學攀龍頻努力  
莫將衰鳳起狂吟



